



पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



नेपाल संवत् १९४१ चिन्लाश्व: / २०७८ वैशाख १ / 2021 April / ल्या: ३३, दाँ:३



न्हूँ दँ २०७८ व बिस्का जात्राया
लसवाय सकल नेपःमिपिन्ता भिंतुना

सहरी आवास पुनः निर्माणया बैठकय् स्वप नगर प्रमुख सुनिल प्रजापति
(२०७७ चैत्र २० गते)



सक्षम साकोस भौतया पदाधिकारीपुं स्वप नगरपालिकाय्

(२०७७ चैत्र १४ गते)





डयगुगु स्वप पौ. बःछि पौ(पाक्षिक)

; DkfbSlo

@)* a#iv !, c^a\$ %(, jif#

न्हूँ दँ २०७८ व बिस्का जात्राया भिंतुना

बिस्का जात्रा ख्वपदेशय् डाय्किगु जात्रा मध्ये लोकंहवागु जात्रा खः । भैलखः लुइगु, ल्योसिं थानिगु व क्वथइगु जात्रा ख्वप देशय् डाय्किगु जात्रा जुसां थुगुजात्रा हलिमय नां जःगु नपां राष्ट्रिय महत्व कः घाड च्वंगु जात्रा नं खः । बिस्काया इलय् ख्वपया त्वाल्य-त्वाल्य थी थी घोया जात्रात जुई । च्याचा गुन्हू तक जात्रा जुइगु जूगुलिं थुकिता नेवः तय्सं च्याचा गुन्हूया जात्रा दक नं धाई । देया थी थी थासं द्रलंद्र मनूत थुगु जात्रा स्व वई ।

संस्कृतिविदपिनिगु धापु काथं न्हःपा न्हापु थुगु जात्रा चैत मसान्तबलय् ल्योसिं थाडः बैशाख सङ्क्रान्ति खुनुं क्वःथइगु याड बिस्का जात्रा मानय याइगु चलन दःगु जुयो च्वना । मल्लकालय् वयो श्व च्याचा गुन्हूतक डाय्कः तःन्हू तक डाय्केगु चलन याता । मल्लकाल स्वयो न्हापु थौ या भैलखः थें जःगु खः मरु । स्वता प्वल्हें दःगु थौ या थजगु भैलखः धःसा जुजु भूपतिन्द्र मल्लया पालाय् जक दय्कगु धाय्गु संस्कृतिविद पिसं धायो च्वंगु दः ।

परम्परानिसें मदिक्वक न्ह्याडः वयो च्वंगु बिस्का जात्रा वांगु दाय् कोरोना भव ल्वय्या कारणं लोकंहवागु बिस्का जात्रा हे मडाय्कसिं दिक्ु याय् माल । न्ह्यला च्यालातक कोरोना भवल्वयया कारणं दिक्ु याड च्वनय् मःबलय् उगु इलय् डाय्के मःगु थी थी जात्रा, नखा, चखात मः काथं पूजा-आजा जक याडक्वचाय्कय् माला । मनूया स्वास्थयता हः नय् तयो नगरपालिकां यागु इनापयाता ख्वपया नगरबासीपिसं दुनुगलं निसें स्वीकार याड दिक्ु याता ।

अथेनं थुगुसयिया बिस्काजात्राया विषय नेन्हू प्यन्हू हाँ तक ख्वपया नगरबासी दाजुकिजा तताकेहें पुं छु याय् -छुयाय् जुईक अन्थौल व अस्पष्ट अवस्थाय च्वनय् माला । नगरपालिकां कोरोनाया स्थितिया बिचः याड बिस्का नखा नपां स्वापु दःपुं सरोकारवालापुं मुंकः बैठक सः त (छलफलं) सहलह याड च्वडागु इलय् ख्वप जिल्लाया प्रमुख जिल्ला अधिकारीजुया नायोसुई चैत्र २२ गते च्वंगु जिल्ला प्रकोप व्यवस्थापन समितिया बैठक बिस्का जात्रा बलय् भैलखः लुय्गु व ल्योसिंघो थानय्गु व क्वथय्गु जात्रा मडाय्केगु निर्णय यागु सार्वजनिक यागु खः । उगु निर्णय नपां जनताया मनय् असन्तोषं (आक्रोस) तं पिकाला । ख्वप नगरपालिकां सुरु निसें हे जिल्ला प्रशासन कार्यालयता सचेत यायां वयो च्वंगु खः । अथेनं जिल्ला प्रशासनं जनप्रतिनिधिपुं नपां छुं हे सहलह मयासें थः यत्थें याकचां निर्णय यासेलिं नेन्हू-प्यन्हूतक अथेयाय् थथेयाय् मदयो काथं मछिंगु ई खानय् दता ।

ख्वप क्षेत्र नं. १ या सांसद प्रेम सुवालज्य व ख्वप नगरपालिकाया न्ह्यलुवाय जनताया मति काथं बिस्काबलय् भैलखः लुय्गु, ल्योसिं थानय्गु व क्वथय्गु जात्रा नं डाय्केगु निर्णय याता । थुगु निर्णय न्यडः जनतात तस्कं लय्ताल । अथेनं चैत्र २८ गते निसें न्ह्याकः २०७८ बैशाख ५ गते तक न्ह्याइगु थुगु जात्रा शान्तिपूर्ण सभ्य-भब्यकाथं डाय्केता नगरपालिकां सकल नगर बासी दाजुकिजा, तताकेहें पिन्ता इनाप याड च्वंगु दः ।

नेम्हा प्यम्हा मनूतय्सं ख्वपया जात्राखय् अनेक निहुँमालः जनताता ल्वाकः जनताता तछुयाय्गु कुतः याड मच्वंगु मखु । अथेनं जनप्रतिनिधिपिनिगु सकृयतां अमिगु कुमतिया उद्देश्य पू वांकय् मखान । संस्कृति म्वाकः तय्गुया नामय् जनप्रतिनिधिपिनिगु विरोध्य जनतात थानय्तांगुलिं अपुं भन भन बदनम जुजुं वाना । अथे जूगुलिं बिस्का जात्रा भी ख्वपया सकल जनताया जात्रा खः । थुगुसीया बिस्का जात्राता स्वास्थय मापदण्ड पालना याडः सभ्य व सुसंस्कृत ढंगं डाय्केता 'ख्वप-पौ बःछि पौ' परिवार २०७८ साल क्यंगु न्हूँ दँ व बिस्का जात्राया लसताय् भिंतुना देछायो च्वडा ।

पिकाक-ख्वप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६१३०४३, ई-मेल- khwopapau@gmail.com

का.रोहितया लुमन्ति महाकवि देवकोटा



महाकवि लक्ष्मी प्रसाद देवकोटा नेपाली साहित्यया छम्हा थिगु नगु (तारा) थें जक धार्ई । अथेनं वयकया प्रगतिशील पक्षयाता अपलं साहित्यकारपिसं मथु पहः याई । गुलिसिनं थुयानं व खाँयाता तपुयो मेदखय् हे यंकय्ता स्वई । देवकोटाया विषय अपलं मनूतयसं अनुसन्धानया याय् धुकल । हकनं याड् चवना तिन । वयकया प्रगतिशील पाटो तस्कं महत्वपूर्ण व अनुसन्धानया विषय खः । का. रोहित जू या लुमन्तिया पुखुली ल्यं पुयो च्वंगु अविस्मरणीय क्षणया चर्चा थौं नं उलि हे स्वाभाविक जुइगु मतिं श्व खाँत पिकायो चवडा ।

कवि जि बनारस ऋः बलय्:

विराटनगरया सगरमाथा साफू पसः (सगरमाथा पुस्तक भण्डार) या बैद्य जीया धापु काथं २००७ साल स्वयो न्ह्योनय् भारतीय दुतावासया सांस्कृतिक सहचारी थें या हलुवाई पसलय् भायो सल्लाह बियो दिइगु । वहे काथं लक्ष्मीप्रसाद देवकोटा जू याता नं बनारसय् ब्वड् यंकय्गु जिम्मा बैद्यजिं कायो दिल ।

बहनी ७:०० ताइलय् कविजिता ब्वड्: यंकय्ता बैद्यजी दिल्ली बजार थ्यंक भाल । पण्डित ब्रम्हनी बज्यै तलय् जा तय्ता भाल । कविजिं जा नायो जक वानय्गु खःला कि जक न्यडः दिल । बैद्यजिं लिपालातकिं तोप तैगुलिं वानय् थाकुइ उकिं मथां वानय् दःसा ज्यू धःसेलिं नेम्हां प्याहाँ वान ।

सुथाय् न्हां डाक गाडीखय् बैद्यजी कविजि नपां थानकोटय् थ्यंक भाल । लायें, रेलय् व बनारस थ्यंबलय् छुं दिनतक कविजि

बाहनी जातड् स्वः वल ज्वी, छँ छु जुला ज्वी दक पीर कायो च्वंगु जुयो चवना ।

बनारसय् च्वड् च्वंबलय् नय्गुया बन्दोबस्त बांलामगु । 'कविजिया बनारस बसाइ'याबारे अपलं मनू तयसं च्वयनं धुकुगु खः । महाकवि लक्ष्मी प्रसाद देवकोटा गौरया समारोहखय् वि.सं. २०१०/११ सालया खाँ खः, गौरया शारदा पुस्तकालयसं छगू लसकुस ज्या इवः व साहित्य मूज्याया ग्वसः ग्वगु खः ।

जि(का.रोहित) न्हय्गु तगिंया ब्वनामि खः । जिम्हा गुरु चिन्ता हरण सिंह जुं लक्ष्मीप्रसाद देवकोटा व मेमेपुं साहित्यकार पिन्ता लसकुस यागु मुंज्याय् यंक दिल ।

शारदा पुस्तकालय्या हःनय्या कुं चाय् च्वंगु लायें व छात्राबासय् स्वकुमि भाजु मयजुपुं यक्व हे मन्ह्यं मन्ह्यं च्वड् च्वंगु जुल । उगु दबुली देवकोटा, वालकृष्ण सम व मेमेपुं पाहां त नं भःगु जुल । मुंज्या न्ह्याकय् धुकल । जि व जिम्हा गुरु चिन्ताबाबु दबुस्वयो भातिचा तापाक्क च्वड् स्वया । दकलय् न्हँ पां नेम्हा-प्यम्हा ब्वनामिपिसं थः थः गु चिनाखं न्यंकला । भातिचा न्हपालाक हे ज्या इवः या बारे सियागु जूसा थमनं नं छुपु चिनाखं ज्वड् वयो न्यंकय् दैगु खाँ मनय् लुयो वल । मुंज्याया लिपा न्वचु वियगु ज्या जुल ।

समारोहखय् देवकोटा गम्भीर खानय् दः । चकांगु म्हवसः चत्त मिलय् जूगु कपालय् साँ, अलय् विचलय् दुबिड् ध्यान मगन जुयो न्वचु बियो द्यूपुं वक्तापिनिगु न्वचु न्यडः दिला । थःगु प्रवचन (नुवाय्गु) या पालय् वयकलं 'हे इश्वर मलाई भेडा बनाइ देजु' (हे भगवान ! जिता फैं याडः बिया) धाय्गु चिनाखं ब्वड् दिला ।

वयकं बियो द्यूपुं न्वचु खय् रुस व चीनया जनजीवनया बारे छसिकाथं ब्वयो दिला । न्वचु चीनया गां-गामयें चाहिला बलय्या अनुभवया खाँ खः । वयकलं चीनया मचाखाचात व थाकालिपुं जेष्ठ नागरिकपिनिगु, ज्या साड् नैपुं ज्यापु-ज्यामिपिन्ता याड् तःगु बांलागु ब्यवस्थाया बारे न्वचु तयो द्यूपुं खः । वयकया न्वचु व चिनाखं आना भायो द्यूपुं सकलं स्वकमि दाजुकिजा, तताकेहें पिसं क्वथिइकः ध्यानतयो न्यडः चवना । बहनिशिया ५:००/६:०० ताइलय् न्ह्याकगु उगु ज्याइवः बहनी सिया ८/९ ता इलय् क्वचाल ।

जिकय् अः तक लुमाड् व काथं बालकृष्ण समजुं विश्व युवा महोत्सव लिपा नेपःया ल्यासे-ल्याम्होया प्रतिनिधि मण्डलय् सोभियत संघ व जनवादी गणतन्त्र चीनया बारे काड् द्यूपुं खः । रुसय् नाः त्वनय्गु प्या चःबलय् नाः त्वनय्गु संकेत व नेपाली



डयंगुगु स्वप पौ. बःछि पौ(पाक्षिक)

लाहाभायँ (हाउभाउ) थुइकय् मफयो फुक्क अलमल जूगु खाँ कडु दिल । बालकृष्ण सम थः चित्रकार जूगुलिं गिलास व नाः त्वंगु किपा कापी खय् चवयो क्यंगुलिं जक नाः त्वनय् खांगु खाँ काडु दिल । अथेहे चुरोट माला दक चुरोट व सलाई कियो चुरोट च्याकगु चित्र चवयो क्यडानिं तिनि ब्यूगु खाँ काडु द्यूगु खः ।
स्वपया विराट साहित्य सम्मेलनय्

२०१३ सालया इलय् टंकप्रसाद आचार्यया सरकार जुयो चवंगु इलय् बालचन्द्र शर्मा शिक्षा मन्त्री खः । स्वपया दतात्रयया तचपालय् दकलय् न्हँपां विराट साहित्य सम्मेलनया गवसः गवगु खः । दबु चुकया दक्षिण पाखय् दय्कगु खः । अलय् पाहाँकाथं ब्वड तःपुं च्वमि, चिनाखँमि व कलाकारत उत्तर पाखय् छसिकाथं च्वड च्वंगु खः ।

उगु ज्या इवः खय् उब्लेया नां जःपुं लोकं ह्वापुं साहित्यकारपुं मध्ये अपलं भायो ब्वति कायो द्यूगु खः । जिकय् लुमाडु वपुं मध्ये लक्ष्मीप्रसाद देवकोटा, लेखनाथ पौड्याल, बालकृष्ण सम, केदार मान ब्यथित अपलं अपः साहित्यकारत भायो ब्वति कायो द्यूगु खः ।

उगु ज्या इवः खय् नं महाकवि देवकोटा जुं 'हे ईश्वर ! मलाई भेडा बनाइ दे' (हे ईश्वर जिता फैं याडः बिया) धाय्गु चिनाखँ ब्वडः द्यूगु खः । स्वकुमि भाजु मयजु पिसं उगु चिनाखँ हकनं छकः ब्वड दियता इनाप यागु खः । चिनाखँ ब्वनय् धुंकः वयक चिया पसलय् द्रहँ भाला । लिपा बजी (खाजा) नय्ता बन्दोबस्त याडु तःगु थाय् गोमारी ब्वड यंकला ।

उगु ज्या इवःखय् बालकृष्ण समं नं छपु चिनाखँ ब्वड द्यूगु खः । नपां अमरसिंह पूघा प्याखंया अभिनय नं याडुः क्यंगु खः ।
कलाकताय् शोकसभा

जि (का.रोहित) कलकत्ताया क्रिकरोडय् 'विद्यार्थी स्वास्थ्य गृह' लय् च्वडः च्वडगु खः । अमृत बजार पत्रिकां महाकवि लक्ष्मी प्रसाद देवकोटा मरुगु बुखौं छापय् याता ।

न्हिनयूसिया ११:००/१२:०० ता इलय् कलकत्ताय् ब्वड च्वंपुं ब्वनामिपिसं ४:००/५:०० ताइलय् छगू बिचः हाय्का (शोकसभा) ज्या इवः तला धाय्गु खबर वल । छुं छगू कारणं जि उगु सभाय् ब्वति काय् मखान ।

बहनीथाय् शोक सभाखय् देवकोटाया जीवनी, साहित्य ख्यलय् वयकया योगदान व चिनाखँ ब्वनय्गु ज्या व श्रद्धाञ्जली प्वंकगु न्वचु ब्यूगु जानकारी वल ।

पेकिङ्गु स्वास्थ्य निवासय् श्रद्धाञ्जली

अक्टुबर १९५९ या इलय्, नेपाल कम्युनिष्ट पार्टीया नेतात नं जनवादी गणतन्त्र चीनया हिकगू निस्वाना दिंया वार्षिक उत्सवय् ब्वतिकाय्ता पेकिङ्गु वाडु च्वंगु खः । उब्लेया पार्टी महासचिव डा. केशर जङ्ग रायमाझी, पार्टीया राजनीतिक समितिया दुजः

पुष्पलाल, कमर शाह अपलं एशियाली अफ्रिकेली ल्यासे-ल्याम्होपुं ब्वनामिपिनिगु स्वास्थ्य निवास 'पाटाचु' धाय्गु थासय् थ्यंगु जुल ।

स्वास्थ्य लाभ याय्गु मतिं च्वड च्वंपुं ब्वनामि पिनि पाखं छगु चिकिचा पागु गवरः (कालोपाटी) खय् महाकवि लक्ष्मी प्रसाद देवकोटाया श्रद्धाञ्जली सभा चवयो तःगु खः ।

श्रद्धाञ्जली सभाखय् न्वचु तयो दिसे पुष्पलाल जिं आर्यघाटय् गणेशमान जि ता देवकोटाया अन्तिम इच्छाया लिसः बारे काडु दिल । गणेशमानजिं देवकोटा जु कय् 'कविजिया अन्तिम इच्छा छु खः? दक न्यडु दिल । कविजिं लिसः बियो दिला- जि, देशय् प्रजातन्त्र वगु स्वय्गु इच्छा दः दक ।'

कविजिया इच्छाबारे पुष्पलाल जिं ब्याख्या याडु दिला - वि.पि कोइरालाया मन्त्री मण्डल संसदय् बहुमतया सरकार खः । नेपाली कांग्रेस थःगु पार्टीता प्रजातन्त्रवादीजक दाबी याडु ज्वी अलय् कविजिं, जिं देशय् प्रजातन्त्र स्वय्गु इच्छा दः धःगु या अर्थ अः भीगु देशय् प्रजातन्त्र मरुगुलिं -प्रजातन्त्र स्वय्गु इच्छा दः धःगु खः । थथे याडु महाकवि लक्ष्मी प्रसाद देवकोटा जुं धात्थेगु प्रजातन्त्र रूस व चीन याय्गु थजगु प्रजातन्त्र स्वय्गु मति दःगु खाँ प्वंकगु खः दक ब्याख्या याडु दिला ।





डयगुगु स्वप पौ, बःछि पौ(पाक्षिक)

भीगु मौलिक पहलं छँ दानिपिन्ता अनुदानया व्यवस्था यायमः

सहरी आवास पुनः निर्माणया रणनीतिक मुद्दात व भावी कार्य दिशा विषयया ज्याइवः गवसः गवयो खवप नगरपालिका पाखं छुं छुं खाँ तयगु मौका वियो द्यगुगुलिं राष्ट्रिय पुनः निर्माण प्राधिकरणया पदाधिकारीपिन्ता दुनुगलं निसें सुभाय् देछाय ।

नकतिनिजक श्व विषय सःस्यु व थुपुं नेम्हा विज्ञपुं सूर्य नारायण श्रेष्ठ व सूर्यभक्त सांगा छँ जुं पुनःनिर्माणया अःया (वर्तमान) स्थिति, समस्या व चुनौतिया बारे न्ह्यववयो दिल । वयकपिसं पुनः निर्माण नपां स्वापु दःगु अपलं अपः अः दयो च्वंगु कानुनया बारे नं खाँ काड दिल । व्यवस्थितकाथं न्ह्यववयो द्यगुगुलिं सुभाय देछाय ।

खवप दे २०७२ सालया तः भवखाचां अपलं धन जनया क्षति जगु थाय् मध्ये छगू खः । भवखा बवगु डादा फुय धुकल अथेनं पुनः निर्माणया ज्या क्वमचःनि । खवप देशय्या १२० गू स्वयो अपः सम्पदात स्यंकः थुडः, ब्यगुलि अः तक खय् १०८ गू सम्पदात खवप नगरपालिकां ल्हवनय्-कानय् व दानय् धुकगू दःसा हिंन्यगू स्वंगू सम्पदात ल्हवड च्वंगु दः । निजी छँ पाखय् ५६८० खा छँ यायपुं लाभग्राहीत दःगु लि नेकगू किस्ता कःपुं २२६१ (४० प्रतिशत) खा छँ व स्वकगू किस्ता कःपुं २०३४ (३६ प्रतिशत) खा छँ यायपुं जक दता । निजी छँ ल्हवनय्-कानय् व दानय्गु ज्या खय् मति तयाथें याय् मफूगुया कारण किस्ता काय्ता तस्कं भञ्जभट जगु, छकलं धेबा मब्यु सें

किस्ता बन्दीखय् धेबा बियो च्वंगु व ई अनुसार धेबा ताडः मब्युगु मू मू कारणत खः । थजगु ज्या खय् प्राधिकरणं सुधार याय् मः ।

अः तक छँ दानय् मफयो च्वंपुं अपलं गरिब परिवारयायुं हे खः । गरिब पिन्ता सरकारं हे छँ दाड बियमःगु माग नं तयो वयो च्वंगु खानय् दः । थजगु इलय् गरिबपिसं थः च्वनय्ता चां काकः छँ दाड च्वंगु दः । चांकाकः छँ दांपिन्ता सरकारी अनुदान मबियगु प्राधिकरणया नीतिं याडः गरिब परिवारं अनुदान काय मखाड च्वन । प्राधिकरणया श्व गजगु नीति खः? छु ? चां काकः भवखाचां मथुइगु काथं बल्लाक छँ दानय् फै मखुला ? देया सम्पदाया थःगु म्हासिइका म्वाकः तयगु खःसा भीगु थःगु पहःया मौलिक सीप, प्रविधि व निर्माण सामग्री छ्यलः छँ दानिपिन्ता विशेष आर्थिक अनुदान बियमः ।

भीगु पुलांगु मठ, देगः, देवालय, शिवालय थजगु सम्पदात सिमन्टी व दण्डी मछ्यःसें हे दाडः तःगु खः । भीगु परम्परागत थःगु प्रविधित गुलि च्वयला धाय्गु खाँ सलंस दाँ तक तः तः हांगु त भवखाचा फयो अः तक धस्वाड च्वनातिनि । डातापोल्हं थजगु देगः त व अपलं छँखा थुकिया स्यल्लागु दसु काथं प्रमाणित याड च्वंगु दः । तः भवखाचां थुड ब्युगु खवपया स्वंगू वनय्कुथित अः



सुनिल प्रजापति

तक ल्हवनय्-कानय् याय् फःगु मरुति । जिमिसं सम्पदा क्षेत्र जगुगुलिं पुलांगु हे पहलं प्रविधि छ्यल पुलांगु पहया निर्माण सामग्रीत छ्यलः परम्परागत शैलीं हे सिं तयो चां काक दानय्ता बः याड च्वडा । अलय् पुनः निर्माण प्राधिकरणं धःसा चांकाकः द्यकगुलि ग्वाहाली याय् मछिं दक पडः तला । खवप नगरपालिकां शारदा मा.वि. ता चांकाकः दानय्ता हे नक्सा स्वीकृत बियवं अः ल्हवनय्गु ज्या हछ्यागु दः । मेमेगु वनय्कुथिता नं पुलांगु शैलीं हे दानय्ता नक्सापासया ज्या हछ्याडागु दः । आधुनिक प्रविधि व निर्माण सामग्रीखय् जक बः कायो जुयगु खःसा भीगु थःगु मौलिक प्रविधि व सीप त भन-भन ताड हे वानिगु जुल । प्राधिकरणं थुगु खाय् बिचः याडः सम्पदा ल्हवनय् कानय् व दानय्गु ज्याखय् मौलिक प्रविधि व परम्परागत निर्माण सामग्री



डयगुगू स्वप पौ. बःछि पौ(पाक्षिक)

छ्यय्केता बः याइगु आशा याय् ।

भीगु सम्पदाया थः थः गु विशेषता दः । भीगु थःगु हे मौलिक प्रविधि दय्कः तःगु उगु सम्पदातय्गु मौलिकता (थःगु पह) म्वाकः तय्ता ल्हवनय्-कानय् व दानय्गु ज्या ठेक्कां बिय्गु बांला मजू । ठेकेदारपिसं सम्पदाया महत्वतास्वयो अपः लबः जक स्वयगुलिं स्थानीय जनतात तयो उपभोक्ता समिति निस्वाडः वा अमानतं हे ज्या सांकेगु कानुनी बन्दोबस्त दःसा भिंकः बल्लाक दानिगु नपां भीगु सीप व प्रविधि म्वाडः च्वनि ।

पुनः निर्माण प्राधिकरणता ज्या सानय्ता आपासिकं कानुन, नीति नियम मरुगु थेंक मताय्का । मात्र सोच भातिचा हिड्कः सा गाः । थौं स्वयो थ्यं मथ्यं दात्याति हौं सम्पदा पुनः निर्माणया लागिं ख्वप नगरपालिकाता डागू करोड तका दां वइगु खाँ धःगु खः । कानुन सम्मत काथं इलय् हे गुगु योजनाया लागत इष्टमेटनिसें फुक्क कानुनी प्रक्रिया पू वांकः ल्हवनय्-कानय्ता धेबा माग याडा । प्राधिकरणया प्रमुख जुया म्हुतुं तः क हे धेबा वैगु आशवासन नं कायागु खः । अलय् अः तक नं ध्याछ धेबा हे ब्यूगु मरुनि । छाय ? पञ्चायती व्यवस्थाय् नं थथे हे जुइगु । जिपुं उकिया विरुद्धय ल्वाडा , अलय् देशय् गणतन्त्र निस्वान । जनतां म्हेगया पञ्चायती व्यवस्था व थौं या गणतन्त्रखय् छु पाःगु मति तय् खांगु दः ?

दकले अजुचाय्पुगु खाँ यां छुलय् धःसा सम्पदा पुनः निर्माण उपभोक्ताता विइगु धेबा एक करोड स्वयो अपः याय् माल । दकः जिमिसं हे सः तयागु खः । तः भवखाचां स्यंकगु सम्पदात ल्हवनय् कानय् व दानय्ता सार्वजनिक खरिद कार्यविधि २०७२ ता

संशोधन याडः उपभोक्ता समिति व लाभग्राही समूदायपाखं निर्माण याय् फौगु शीर्षकय्-‘तः भवखाचां स्यंकः थुडः ब्यूथाय् राष्ट्रिय महत्व कः घाड च्वंगु पुरातात्विक सम्पदात ल्हवनय्-कानय् व दानय्ता (सम्बन्धित) स्वापु दःगु नगरपालिकाया सिफारिसखय् हिगू करोडतक लागत अनुमान दःगु योजनात नगरपालिकां निस्वांगु उपभोक्ता समिति पाखं याय् फौगु ’ व्यवस्था यात । २०७५ सालय् सार्वजनिक खरिद कार्यविधि संशोधन जुय धुंक जिपुं लय ताया । जिमिसं न्हापा ख्वप नगरपालिका तयो तःगु भवन, इखालाछी मठ थजगु उपभोक्ता समितिपाखं ल्हवनय्-कानय् व दानय्ता स्वीकृति बिया दक तःकः हे ताकिता याड अनुरोध पत्र च्वया, अथेन. अः तक नं स्वीकृति म्ढय्नि । नगरपालिकां थमनं हे दानय्ता कानुन बमोजिम स्वीकृति माग याड नं म्ढय्सा अः तः तः हांगु खाँ ल्हाडां छु हे अर्थ दै मखु ।

भीगु थःगु हे मौलिक शैलीखय् दानय्गु सम्पदाया लागिं अपलंसिं मालिगु, मःगु सिं मदयो गुलिं संरचनात दानय्ता पंगः जुयो च्वंगु दः । मछिड च्वंगु दः । अथेजुगुलिं भीगु सम्पदा भीसं हे दानय्गु भावना दःसा सम्पदाया लागिं मः काथंया सिं नेपःया सरकारं हयो बियगु व्यवस्था याय् मः ।

ख्वप नगरपालिकां कला-संस्कृति संरक्षण विधेयक पारित यागु

दः । नगरया पुलांगु लागाय् सिमाड्कन (चें कियो) याड उगु लागता स्थानीय सरकार सञ्चालन ऐन २०७४ काथं सांस्कृतिक क्षेत्र घोषणा यागु खः । उगु लागदुनय् भीःगु हे शैलीं छुं दय्किपु छुं थुवः पिन्ता मोहडाय् छयलिगु अपा, सिं व पोल्हँअपाया मूल्याड्कन याड तुक्वखय् ३५ प्रतिशत अनुदान नगरपालिकां ब्यू ब्यू वयो च्वंगु दः । नपां सांस्कृतिक लागु दुनयया छुं -बुँ स्थानीय बाहेकं मेपिसं न्याय-मिय याय् मदैगु व्यवस्था नं उगु ऐनय् दः । भीगु संस्कृति व सम्पदा म्वाक ! तय्गु मतिं जिमिसं थजगु कानुन दयकागु खः । अलय् छम्हा नेम्हा सम्पदा बिरोधी तय्सं सर्वोच्च अदालतय् वाड रीट दर्ता यासेलिं अदालतया अन्तरिम आदेशं थुगु ज्या पाड तःगु दः ।

पुनः निर्माणया समस्या ज्यंकय्या लागिं निजी आवास निर्माणय् लाभग्राहीपिन्ता फुक्क धेबा छकलं बियगु, अनुदान धेबा ताडः बियगु, चांकाकः दय्कगु छुं याता नं अनुदान वियगु सम्पदाया लागिं मःगु सिं नपां मः मः गु ज्या या लागिं प्राधिकरणं ध्यान बियफःसा पुनः निर्माणया ज्या चतारं हछ्याय्ता ग्वाहाली जुई ।

(ख्वप नगरपालिकाया प्रमुख सुनिल प्रजापति जुं सहरी आवास पुनः निर्माण या रणनीतिक मुद्दात व भावी कार्यदिशाया विषय सं २०७७ चैत्र २० गते शुक्रबार यें ग्वसः ग्वगु छन्हूया कार्यशाला गोष्ठी बियो द्यूगु न्वचु)

ख्वप नगरपालिका नगरवासीतय्गु थगु हे संस्था खः

करदातातय्सं इल्यहे कर पुलदिसँ

नगर विकासयाय्ता ग्वाहाली याड दिसँ

बिस्का जात्राया विषय नगर प्रमुख जुया सन्देश

बिस्का जात्रा हज्याड वयो च्वंगु दः । थव हे इवल्यु चैत्र २२ गते च्वंगु जिल्ला प्रकोप व्यवस्थापन समिति (डिसिसिएमसि) या बैठकं यागु 'भैलखः लुयगु व ल्योसिंघोया जात्रा मजुइगु' निर्णय पिब्वत । थुगु निर्णयखं काथं मछिगु ई प्याहाँ वल । गुगु स्थिति खाड जिमिगु गम्भीर ध्यान वांगु दः ।

खवप नगर कला व संस्कृतिया तः मिगु सांस्कृतिक नगरी खः । थुगु खवपदेशं कला व संस्कृति व सम्पदा म्वाक तयता दकलय च्वजायक ज्या साडः च्वंगु दः । दाच्छीतक डायकः च्वनिगु थी थी जात्रा, सांस्कृतिक ज्या इवः खं थुगु नगरीता न्ह्याब्ले ग्वाड च्वंगु, जीबन्त याड तःगु फुक्क सिनं स्युगु हे खौं खः ।

खवप डायकिगु जात्रा मध्ये बिस्का जात्रा नं छगू महत्वपूर्ण जात्रा खः । खवप डायकिगु जात्रा जूसां थव हलिमय नां जःगु राष्ट्रिय महत्व कः घाड च्वंगु जात्रा खः । न्हँदँ दुस्वः वय साथं भ्नीगु देशय व देशं पिनय च्वडः च्वंपुं लखंलख नागरिकपिसं प्राविधिया माध्यमं प्रत्यक्ष जात्रा स्वयगु याई । अथे जगुलिं थुगु जात्रा न्ह्याकयगु व व्यवस्थापन यायगुलि खवप नगरपालिका अत्यन्त संवेदनशील जुयो च्वंगु दः ।

न्हापा - न्हापा प्राचीन कालयु निसें मदिक्क न्ह्याकः च्वंगु बिस्का जात्रा वांगु दायें कोभिड १९ या हुनिं बन्द जुल । लकडाउनया हुनिं बिस्का जात्रा नपां थयं मथयं च्यालातक खवप देशयु डायकिगु थी थी जात्रा त मः काथं पूजाजक याडः क्वचायक्य माला । नगरपालिकां जात्रा, पुजानपां स्वापु दःपुं दाफा, भजन, गुथि नपां थी थी सरोकारवाला मनूत नपां मदिक्क सल्लाह-बल्लाह याडः निर्णय यायां वगुलिं छगू छगू ज्या इवः तः अपूक हे क्वचाल । नगरपालिकाया छगू छगू ज्या इवः ता पला पला पतिकं साथ व ग्वाहाली बियो द्यूपुं सकल जनसमूदायता दुनुगलं निसें सुभाय देछाय ।

थुगुसीया बिस्का जात्रा शान्तिपूर्ण काथं क्वचायकेता भैलखः दयकेगु ज्या सांसांनिसें गुठी संस्थान कार्यालयया प्रमुख ज्यु नपां च्वडः, सल्लाह याडः, हज्याड च्वडागु खौं नं थाना सकल जन समूदायता ब्याक च्वडा ।

२०७७ साल चैत्र १७ गते प्रकोप व्यवस्थापन समिति भक्तपुर (सी एमसी) या बैठक च्वडः थुगुसीया बिस्का जात्रा शान्तिपूर्ण व मर्यादित काथं सामान्य काथं क्वचायकेता जात्रा नपां स्वापु दःपुं सकल नपां सल्लाहत कायो हज्यायगु निर्णय यागु खः । वहे निर्णयकाथं चैत्र १९ गते भैलखः जात्रा व ल्योसिंघोया जात्रा नपां स्वापु दःपुं दाफा, भजन, गुथि, टिम, क्लब, जात्रा व्यवस्थापन समिति नपांया पुचः त नपां मंकः बैठक च्वड थुगुसी कोभिड १९ या संक्रमणता बिचः याड निर्णय यायता मेगु बैठक सःतयगु कुतः याड च्वडागु इलय हे खवप जिल्लाया प्रमुख जिल्ला अधिकारीया नायोसुई च्वंगु जिल्ला प्रकोप व्यवस्थापन समितिया बैठकं भैलखः लुयगु व ल्योसिं थानयगु जात्रा मयायगु' निर्णय पिता हला । खवप देशयु जुइगु जात्रा सम्बन्धि महत्वपूर्ण निर्णय यायता स्थानीय

तहनपां सल्लाह साहुति वा समन्वय यागु जूसा थजगु स्थिति स्वय म्वालिगु जुई ।

जिल्ला प्रकोप व्यवस्थापन समितिया निर्णय पिब्वसेलिं तुरुन्त चैत्र २३ गते बिस्का जात्रा नपां स्वापु त पुं फुक्कसिता बैठकय सःत भैलखः व ल्योसिंघोया जात्राया विषय लिपा बैठक च्वनयगु याडः त्वाल्यु-त्वाल्यु जुइगु जात्राता स्वास्थ्य सुरक्षा मापदण्डया प्रबन्ध याडः डायकेगु निर्णय याता । जिपुं भैलखः व ल्योसिंघो लुयगु जात्राया बारे जनतापाखं सार्वजनिक रुपं प्वंकगु नुगः खौं प्रति तस्कं संवेदनशील जुया ।

लखं लख जनतानपां सरोकार तैगु भैलखः व ल्योसिंघोया जात्रा बारे जिल्ला प्रकोप व्यवस्थापन समितिया निर्णय ल्हवनयता थौं हे तिनि माननीय प्रेम सुवाल नपां जिपुं जनप्रतिनिधिपिनिगु छगू पुचः प्रमुख जिल्ला अधिकारी नपालाड छलफल याडा । वयक थुगु खायँ अत्यन्त सकारात्मक जुयो दिल । थव विषय ज्यंकयता गुलि लिपा लाता उलि हे थाकुइगुलिं थौं हे च्वडागु प्रकोप व्यवस्थापन नगरसमिति नपां जात्रा नपां स्वापु दःपुं नपां बैठक च्वड क्वय च्वया काथंया निर्णय जुलः

१. लोकं हवागु भैलखः लुयगु, ल्योसिंथानयगु जात्रा कोभिड १९ या ल्वय संक्रमणया जोखिमता बिचः याड मः काथंया स्वास्थ्य मापदण्ड मानयु याड सभ्य व शान्तिपूर्ण तरिकां डायकेगु ।
२. जात्राया प्रसारण टेलिभिजन, रेडियो, एफ.एम व सामाजिक सञ्जालपाखं नं यायगु ।
३. अनुशासित व मर्यादित काथं स्वास्थ्य मापदण्ड पालना याड सभ्यकाथं जात्रा क्वचायकेता माइकिड याड इनाप यायगु ।
४. बिस्का जात्रा न्ह्याकयता मः काथं तयारी यायता स्वापु दःपुं फुक्क सिता इनाप यायगु ।
५. जात्राजःछि शान्ति सुरक्षाया फुक्क बन्दोबस्त जिल्लाय च्वंगु सुरक्षा निकाय पाखं यायगु ।

थःगु मौलिक पह व प्रविधिखयु तः मिगु खवप नगरपालिका दुनयँ जुइगु छगू छगू ज्या भ्नीगु हे सीप व प्रविधिया लिधंसायु हज्यायता खवप नगरपालिकां बः बियो च्वंगु दः । वैकल्पिक विधि 'ख' दयकेगु जात्रा न्ह्याकयगु, थजगु ज्याखं गनां भ्नीगु थःगु मौलिक पराम्परागत विधि व सीप ताड वानिगुयां मखुला धायगु खायँ जिपुं तस्कं सचेत जुयो च्वडा ।

खवप नगरपालिका न्ह्याब्लें नगरबासी पुं नपां हे दः । न्हा-न्हापायायु दिनयु थें छिकपिनिगु रचनात्मक सल्लाह व सुभावा बियो थवस्वयो बांलाकः व्यवस्थित याडः हज्यायता ग्वाहाली याइ धायगु आशा याडा । बिस्का जात्रा मेपिनिगु मखु भ्नीगु हे जात्रा खः । भ्नीगु थःगु जात्रा तस्कं बांलाक सभ्य, भव्य काथं डायके । न्हँगु दाँ २०७८ सालया लसताय सकल नगरबासीपुं नपां देश-विदेशयु च्वड च्वंपुं सकल नागरिकपिन्ता दुनुगलं निसें भिन्तुना देछाय ।

शासक दलं न्हपालाक सरकार म्वाकय्गु लाकि कोरोना मपुंकःपानय्गु ?

विवेक

नेपाली कांग्रेस केन्द्रीय कार्य समितिया चैत्र १९ गतेया बैठकं नेकपा (एमाले) या नायो के पी ओलीता पदय् चवड चवनय्गु नैतिक अधिकार मरुगु खाँ न्हिथासे 'कांग्रेस न्हगु सरकार गठनया लागि हचिलय्गु' निर्णय यात । फागुन २३ गतेया सर्वोच्च अदालतया फैसलां एमाले व माओवादीया औपचारिक विभाजन लिपा माओवादी अः हे तुरुन्त समर्थन लिता काय्गु धा धां वयो च्वंगु दः । प्रधानमन्त्री ओली नं धःसा समर्थन लिता कालकिं राजिनामा वियगु धा धां वयो च्वंगुलि माओवादी अः तक समर्थन लिता कःगु मरुनि ।

नेपःया संविधानय् अविश्वासया प्रस्ताव दर्ता नपां बैकल्पिक सरकारया नेतृत्व सुनिश्चित याय् मःगु ब्यवस्था दः । अः तक विपक्षी दलतय्सं अविश्वास प्रस्ताव दर्ता याय्ता हचिल मवगुया कारण नं थव हे खः । माओवादीया नायो प्रचण्डं थयं मथयं लत्या हाँ निसं नेकांया सभापति शेरबहादुर देउवा व जसपाया नेता महन्त ठाकुरता वैकल्पिक सरकारया नेतृत्व काय्ता- विन्तिभाव याड च्वंगु दः । हिदातक संसदीय व्यवस्थाया विरुद्ध ल्वाभः (हतियार) ल्हाडागु दाबी यापुं माओवादीत शान्तिपूर्ण लायें डायो वसेलिं 'संसदीय व्यवस्थाया फोहरगु पुखुली' थाहाँ वय हे मफय्क दुड च्वंगु दः । प्रचण्डया नितिं देश व जनताया आर्थिक, सांस्कृतिक परिवर्तन गुब्ले हे हः नय लः मव । भारतया साथ व ग्वाहालीं न्ह्याथय् याड जूसां सरकारय् वानय्गु हे वयागु न्हपांगु ज्या खः । विचः खः ।

शनिवार लुम्बिनी वाड कार्यकर्तातय् दशवी भाषण याबलय् प्रचण्डं 'सरकार हिडकेगु विषयया बैठकय् ब्वति काय्ता ४:०० ता इलय् यें वानय् ताडा' जकधाला । नेकां नं सरकार निस्वानय्ता हचिलय्गु निर्णय यासेलिं प्रचण्डया ख्वालय् न्हिलासु दाड च्वंगु दः । व गवः न्हूँ तक खानय् दैगु जुई, स्वय बाकी हे दः नि । अथेनं कार्यकर्तातय्ता पुँजीवादी सरकारय् द्वहँ वानय्गु लोभ क्यनय्गु बाहेक वयाकय् मेगु सिद्धान्त व बिचः या छुं हे खाँ ल्यं मत ।

अस्थिर नेताया म्हासिडका पिब्वयो जूम्हा प्रचण्ड भारतया इशारा मदय्क फितिकुति नं सानय् फैं मखु । छगू खाँ स्वय-२०६४ सालया संविधान सभा निर्वाचनया । नेकांया सभापति गिरिजा प्रसाद कोइराला दकले न्हःपां गणतन्त्रया विरुद्धय हः जुला । भारतया नितिं नेपः या राजतन्त्र पंगः जुयो च्वंगुलिं राजतन्त्र हाकुतिनय्ता भारतं नेपालय् सशस्त्र संघर्ष याड च्वपुं माओवादीता

सतिम्हा पासा भः पिला । संसदया दकलय् तः हांगु दल नेकांसं ज्यू मधः तलय् गणतन्त्र हय्गु सम्भव मरु । न्हय्गु दलया आन्दोलनया मू न्हयलुवा जुयो च्वम्हा गिरिजा प्रसाद कोइरालाता न्हापांम्हा राष्ट्रपति बियगु प्रचण्डं आश्वासन बिला । भारतया इच्छा व गिरिजाया न्हापांम्हा राष्ट्रपति जुयगु म्हागसया लिचव नेका केन्द्रीय कार्यसमितिं थःगु विधानय् संवैधानिक राजतन्त्रया थासय् 'गणतन्त्र' तयो भाय् हिडकला ।

गिरिजा प्रसाद कोइराला गणतन्त्र नेपःया न्हापांम्हा राष्ट्रपति जुय दैगु आशाय् २०६४ सालय् जूगु संविधानसभा निर्वाचनय् प्रत्यक्षपाखं चुनावय् तक मल्वा । वयकं उम्मेदवारी बियो द्युगु खःसा अपलं थासं त्याकय् फैंगु सम्भावना दःगु खः । वयक समानुपातिक पाखं हे संविधान सभा खय् वला । देशां देछी पाखं थयं मथयं बहुमतहे माओवादी त्याकसेलिं गिरिजाता राष्ट्रपति याय्मते जक भारतं गांगु धाय्गु राजनीतिया तस्कं चतुरम्हा कासामि गिरिजां मथुइगु यां खाँ हे मखुत । नारायणहिनि दरवार संग्रहालय् उलेज्याया दिनसं फुक्क उच्च पदस्थ मनू तय्गु दशवी औपचारिक रुपं हे नुवाड दिला "जि सुं नपां ग्याय मखु । भारतया हःनय नं कपः क्वछुकय् मखु ।" उब्ले आना भःपुं सकलेँ अजु चाल । राष्ट्रपति निर्वाचनया चर्चा जुयो च्वंगु इलय् सरकार प्रमुखं नुवागु पक्का नं फुक्क सिया नितिं अजुचाय्पुगु खाँ खः ।

थुगु घटनाया धात्थेंगु घटना उल बिय धुंकुगु दः । पूर्व परराष्ट्र मन्त्री रमेश नाथ पाण्डे जुं । वयक व प्रचण्डया दशवी संविधान सभा निर्वाचन लिपा २०६५ साउन २० गते नेपालाय्गु ज्या जुला । नेपालाय्गु इवलय् उब्लेया भारतीय राजदूत राकेश सुद भःगु व वयकता मेगु कोथाय् तयो प्रचण्डं सुदता नेपालाय्गु खाँ धःगु दः । सुद नेपालाय् धुंकः प्रचण्डं पाण्डे जुता धायोदिल- 'नेपाली कांग्रेसं खाँ हे मथु । भारतं गिरिजाता राष्ट्रपति याय्गु मति मतः । अः नं सुदं गिरिजाया नां तक मकः । कांग्रेसं मधेसया नेतायाय्गु जक नां बिड्गु याता हे सर्वसम्मतिं राष्ट्रपति यो दक धायो च्वना । जिं नां धायो दिसैं धाया बलय् 'त्यलकिं धाय्' धाला । नां हे मसियाम्हासिया बारे छु खाँ ल्हाय्गु धाया बलय् यां धम्की बिला



डयगुगु स्वप पौ, बःछि पौ(पाक्षिक)

-‘धायगु खॉ मन्यौसा छ नपां भारतं ज्या सानय् फै मखु ।’
(क्रान्ति र प्रतिक्रान्ति, पेज १६) दक ।

उकिलिपा तराईया रामराजा प्रसाद सिंहता राष्ट्रपतिया उम्मेदवार काथं थाना ।नेपाली कांग्रेसपाखं राम वरण यादवता राष्ट्रपतिया उम्मेदवार काथं थाना । नेमकिपां यादवया पक्ष मतदान याता । नेमकिपाया मतं यादव राष्ट्रपति खय् त्याता । थव भारतया लागिं म्हुतुप्वः तिकया लिसः खः । माओवादीत उब्ले नेमकिपा खाडः अपलं तंम्बयो तसिक आक्रमण याता । देशघातीत तं चः सां ईलं नेमकिपाया पला थासय् लागु साबित याता ।

भारतं नेपःया राजनीतिखय् यक्व दाँ हॉ निसें फू फूयाड स्वयो च्वंगु दः । थमनं लाहापा द्वालयं प्याखं ल्हुइकय् फैम्हा सरकार दय्केता वं न्ह्याब्लें कुत याड च्वनि । माओवादीं सरकारता ब्यगु समर्थन लिता काय् धुनयवं हे वा केपी ओलीं राजिनामा बिय वं हे सरकार दय्केगु मौका ‘जनता समाजवादी पार्टी’ता वानि । थुगु परिस्थिति वयवं हे दकलय् अपः भारत लय् ताई । छाय धःसा महन्त ठाकुर, राजेन्द्र महतो, बाबुराम भट्टराई, उपेन्द्र यादव नपांया वायुं जःपा देपा (प्यादा) त नेपः या राजनीतिया निर्णायक थासय् थ्यनि ।

भारतं नेपालय् छुं नं बल्लागु सरकार वैगु यो ताय्की मखु । बल्लाम्हा सरकारं भारतया मति काथं ज्या मयाय यो धाय्गु खॉ भारतं बांलाक थू । लिम्पियाधुरा, लिपुलेक व कालापानीया नक्सा पिब्वयता दुई तिहाइया ओलीया न्ह्यलुवाया सरकार जगुलिं सम्भव जुगु खः । मिलिजुली (मंकः) सरकार जगु जूसा व छुं हालतय् हे संभव दैगु मखु । नेकपा तज्याइगु हे पक्का खः व सर्वोच्च अदालतं याड बिला । तज्याड उकिया रुप न्ह्याथें हे जूसां सार धःसा भारतया मति काथं जगु स्पष्ट जू । तज्याडः दकलय् अपः असर सुयातां लाःसा व माधव नेपालता जक खः ।

प्रचण्ड थःगु लायें स्पष्ट काथं हज्याड च्वंगु दः । वं भारतया लागिं ओलिया विकल्प काथं दय्किगु सरकार ‘तस्कं ज्या छिनिगु’ (कम्फरटेबल) खॉ सार्वजनिक रुपं नुवागु हे खः । अभू ‘क्रान्तिपुर’ न्हि पौ या सुधीर शर्मा नपांया खँलाबलाखय् पार्टीं तछ्याछ्यां जुयगु थःगु बानी जुय धुंगु दक धाला अलय् ‘अःपः नेकपा तछ्याय्गु’ जक फुक्क सिया हःनय् तप्यंक धःगु हे खः । अजम्हा नेतापाखं नेकपा विघटन यागु छुं अजुचाय् पुगु खॉ मखु । अलय् वयागु लिउने ब्वाक ब्वाक जुइपुं हनुमानत खड धःसा कनाचाय्पुसे च्वं । गुम्हासीं तप्यंक स्यंकय्गु थुय्गु, तछ्याय्गु दक सार्वजनिक रुपं धायो जू यानं खॉ मथुपुं ।

राजनैतिक अस्थिरता नेपःया नियति हे जुय धुंकल ।

२०१७ सालय् बि.पि. कोइराला नेतृत्वया सरकारं दुईतिहाई बहुमत काला । नेदा हे मतुकः व सरकार क्वथला । वनलिपा संसदीय प्रणाली काथं दयकगु छुं नं सरकारं पूर्वांक ई ज्वः छि ज्या सानय् मफः । थुकिया मू हुनि नेपःया राजनीतिखय् न्ह्याब्लें भारतं याड च्वंगु हस्तक्षेप हे खः ।

थःगु लाहातय् सरकार दय्केगु तँचा वैगु पक्का जुय धुंक जसपाया नेता तयसं संविधान संशोधनया माग हछ्याड हयो च्वन । अमिसं उधारो हैन नगदै’ (थिक मखु दां पुल हे) दक धायो नागरिकता थजगु थी थी मेगु विषयलय् संशोधन याकेगु लाँपु माल च्वंगु दः । उकिं जसपाया नेतात थःगु जक भिं जुइगु ज्या खय् ग्वाहाली याइपुं ओली सरकार वा उकिया पलि दय्किगु सरकार नेगूलिंतां समर्थन याय् फैगु भाय्ल्हाड च्वंगु दः । धाइगु खॉ न. दः - मनूत नेखय् त्यलय्गु मतिं स्यनि पशु एकोहोरो जुयो स्यनि ।’ अः नेकपा तज्याथें न्ह्यु सरकार दय्केगु प्रक्रिया नपां जसपां नं वहे गति फय् म्वाली दकः धाय् फै मखु ।

सरकार जनताया निमित्तं खः । जनताया दुःख सुखखय् सरकारया ध्यान वानय् मःगु खः । अलय् शासक दलपिनिगु मिखालय् जनता गुब्ले. हःनय् मव । भारतय् न्हिया न्हिथं कोरोना भवत्वयया ल्वगित तस्कं अप्वयो च्वंगु दः । छन्हूया लाखौं मनूत कोरोना ल्वचं उथिउथि कांकगू व छव खय् हिन्डसम्हा स्वयो अपः मनूतय्गु ज्यान वाडः च्वंगु समाचारत पिब्वयो च्वंगु दः । अलय् शासक दल याय्पुं धःसा सरकार क्वथय्गु वा थानय्गु कासाखय् जक जुयो च्वंगु दः । कोरोनाया थापाच गयापुगु इलय् सीमा नाकाय् कडा याय्गुलि सरकारया ध्यान हे मवां । कञ्चनपुर, कैलाली, रुपन्देही थजगु थासय्या खुला सीमा जगुलिं न्हिं द्वाल्द नागरिकपुं भारतं ल्याहाँ वैगु अमिता खः थें डांकः नेम्हाप्यम्हा जक परीक्षण याडः च्वंगु दः । कोरोना या नेक्वगू लकर तस्कं हे गयापुगु जुय फः दक सः, स्यु, थुपुं विज्ञपिनिगु खॉ शासक दल तयसं बेवास्ता याड च्वंगु दः ।

फ्रान्स, ब्राजिल, सं.रा. अमेरिका, बेलायत थजगु बिकसित देशं अपलं ल्वय डाडः पुडः मनूत सीड च्वंगु खॉ याता बिचः याड हकनं लकडाउन याता । छु भ्नी शासक दलपिसं उगू देश पाखं शिक्षा काय्म्बला ? न भ्नीकय् मः काथं अस्पताल दः, न क्वारेन्टाइन वा आइसोलेसन हे दः । मेगु देशय् थें भ्नीथाय् नं डाडः पुडः वांथें अः पश्चिम नेपः नेकगु लहरया कोरोनाया केन्द्र जुय तांगु दः । शासक दलया ध्यान सत्ता क्वथय्गु व थानय्गु स्वयो कोरोनां गथे बचे याय्गु धाय्गु खायें वानय्मःगु खः । जनताता स्वास्थ्य सड्कट जुइबलय् छुं मयाइपुं शासक दलं इलय् हे बिचः याइगु जनतां आशा याड च्वंगु दः ।



आदर्शया पुसा

आशा कुमार चिकंबजार

आदर्शया बाखं न्यडा, ब्वडा, च्वया अथेनं आदर्शया लॉपु डायगु तस्कं हे थाकु । पुंजीवादया काँ इवाल्य बुयो वगु जः वानिगु स्वमा गथे काँ नपां बच्य जुयो ल्वाड काँ माँ हे गसी थें याड थाहाँ वै अल्य न्ह्यागु थासं नं प्याहाँ वयो स्वं हवईथें संघर्षया लॉपु ज्वड हज्याइपुं मनू तयगु जीवनी ब्वं ब्वं स्वतिड वांगु जीवनया स्वति पायँ फ्यँ फ्यं वानयगु इवल्य नेख्य सिथयया कतया हेपाहा प्रवृतिं गुब्लें गुब्लें लॉपु हिडकय्ला धायगु मतिं चिचि च्यासां काचाक्क स्वमब्यनिगु जिन्दगीया समस्या कः घाडः दुधःजगु ज्यु ज्वडः मनूत थगु आजुई थ्यंकयता खूकायो जूसां वाड च्वनि ।

जीवन संघर्ष खः । ब्वडा । म्वायता ल्वाड हे हज्यायूमः वनं ब्वडा । अल्य न्यनयगु व ब्वनयगु थें जुयगु व यायगु तस्कं हे थाकु । सफलताया बाखं न्य न्यं योजनाया लॉपु छ्याडः सिद्धान्तया कुसां कुयो, आदर्शया नं फियो, थः ता थमं म्हासिडक जुय मफूसा असफलताया गाल्य दुनय फः । छक गाल्य दुनकिं थाहाँ वय तस्कं हे थाकु । अस्पतालया बेदय च्वड



थःगु आत्मसंस्मरण च्वयो च्वंडाम्हा जि कतया मनय सायद अतीतया खॉ कुसाकुतिं कू थें कुल च्वडा अल्य नुगः दुनयलिकुड च्वंगु दुःखया प्वः फ्यड च्वडा कपायँ फेनेथें अल्य वहे मनय दुनयया कपायँ फ्यँ फ्यँ क्वापी दुनयया क्वापी मकचाय च्वसां च्वसाया न्याचाय कपायँ फ्यड कतु जायक च्वडा । छगू गन्तब्यया किपा कियो, आजुया देगः दाडः च्वडा ।

देशय पञ्चायतया निरंकुश राजतन्त्रया ई । गरिबीं जःगु छवप दे अल्य सामन्त व अमिपुं चम्चाथजपुं बुथुपिनिगु शोषणया घचाय थानाया किसानत न्ह्याब्लें छुस्या क्यः थें क्यल च्वंगुलि न्ह्याक्वहे मेहनत यासां अमिगु हिचःति खय मोज याड च्वंपुं शोषकया प्वा मजः । 'छँ सुचु बुथु पाचु' धाधां बूँ वः क्व बाली पुलः बुथुया छँ सितिं ज्या साँ वाड च्वंपुं थः बाज्या, अजि, तरिबवा, तरिमा, अका-मामा फुक्क सिया ब्वहल्य दुःखया खः कुबिय म्वः पुं सुं हे मरु । गनां छक इयातुगु क्वल्हँया पा ह्युसा लिपा लागु द्वपं विडगु, पः हिलिपुं व हिप वडपुं मनूत नं सुं हे मरु । अज्ञानता व

अशिक्षाया ख्यंखं मुंक पचिपचियाड हज्याड च्वंपुं किसानतयता ज्ञानया मिखा छुकयगु चान्चुनगु खॉ मखु । उगु लॉपु हकनं मुलुपायँ डायगु थें हे खः । पुलांगु खॉ लुमांक च्वं च्वं म्हायँ न्हाकच्वाकं बुयो व थें उसिमिसी दाड वल । वं ययो नं पुलांगु खॉ लुमांक च्वन

मय्यो नं लुतुलुयो अतीतया छ्वबाय ब्वड यंक च्वन । गनां मछिं थें छ्वसामां तितुत्युथें छ्वध्यचां ख्वाल्य दः थें वायता छगू छगू घटनां कसायो वयो च्वना । वं च्वसा दिक मिखालं थः च्वय्या ढलान पाख्य स्वयो च्वन । व तुइसे च्वंक स्वाखलं पाड तःगु ढलानपाया दश्वी च्वंगु बिजुली मताया सिलिड फायन यतेय्यतय गायो च्वंथें वयागु मनया खॉ नं यतय प्यतय गायो च्वन । गनां दिकयगु थाय मामां कापी दुनय चौतारा माल च्वन ।

थगु खॉ अखयला थखयला मदयक चिच्चाहिकम्हा माकचा छम्हासिं भूजिं छम्हा ज्वड भुईं भुईं हायक च्वन । भुजिं बिस्सु वानयता आँटय निसंया बः पिकायो संघर्ष याड च्वन । माकचां नं बूबलय निसंया बः पिकायो भूजिंता ज्वड च्वन । नेम्हासिया भैलखः गख्य न्ह्याइगु जुई । थाथु न्ह्याइला, क्वथु न्ह्याइला, मनं क्वः छिय मफूगु खॉ नं गुब्लें गुब्लें दिक्क याय यो । अमिगु जीवन मरनया संघर्ष मनय भुस्याय थाड च्वन । माकचा त्यात, भुजिं बुत । छगू अध्याय क्वचाल । सात सालय राणा शासन क्वः थयो हःगु प्रजातन्त्र सत्रसालं जुजु महेन्द्र क्वथयो पञ्चायती व्यवस्था हः बलय थें । व माकचा उखय छक थुखय छक तिं न्हूल, जुजु महेन्द्र थें । हकनं जः प्यन वं नेपःया संविधान २०१९ थें । जालय सोभासिधा पुं भुजिं पाँती त तः क्यनि । माक चायगु आहारा जुई । अग्रजपिसं कांगु पञ्चायती व्यवस्थाया अत्याचार व माकचां नपां ज्व लाक स्वय । अस्पतालया बेदय च्वड । याकचा, क्याबिनय, ल्वय भण्डै लानिथें च्वंगुलिं बिरामी पिवतनं उलि च्वनय म्वः धायो हे थः थः गु ज्या छ्वगु । अल्य ई



डयगुगु स्वप पौ, बःछि पौ(पाक्षिक)

छ्यल्यता वहे चवसा व कापीया पाना जायक च्वंगु इलय् डाक्टर व नर्स राउण्डय् वल । जिगु याकागु ई तांक वयक पुं द्रहँ भः सेली जिं चवसा व कापी फवडा तः लय् सुचुका ।

नर्स नं नाइक न्यन -वास भपिय सिधलला ? जिं लिस बिया- धुन । अलय् डाक्टरं स्टेथिसकोपं जिगु नुगः दुगाथी, छाती ततं धाल । सर, अःछिता गयच्वं ? जिं धाया न्हापास्वयो यक्व हे जिल । डाक्टर मुसुक्क न्हयल । पुलांगु खाँ जि लुमाडमवगु, गुलिं खः थें जक बुलुगु अतित पोलः हल व डाक्टरं । सर जिमिता ब्वंकबलय् काड द्यगु आदर्शया खाँ जिमिकय् लुं चवयागु आखः थें छापा जुयो च्वंगु दः नि सर । अथे नं थव गजगु समाज ? धेबा मदयकः काय् म्हयाय् नं हे मां ब्वा मधाइगु ई । म्हेगः तिति छम्हामनू अपरेशन यायता धेबा पुलय् महयो अपरेशन लिपा लाडसीत । काय्पुं धेबा पुलय् मफुपुं नं मखु । अथेनं वं वयाता वं वयाता चिडकः च्वन । सल्लाह सल्लाहखय् डुंगाहे नाखय् दुन । गुलिं अस्पतालय् वाय् है । स्वः वै मखु अलय् अस्पतालया बेदं छँ ल्याहाँ वानय् फैमखु । फवड नै । गुम्हासिता वृद्धाश्रमय् तय यंकी । पुँजीवादी ब्यवस्थां गरिब जनताया भिं याइमखु । अस्पताल स्वस्वं सीय माली दक छिं ब्वंक बलय् जिपुं पत्या मजुया गुळ्ने गुळ्ने कक्षाकोठाय् राजनीति खाँ काना जक मनय् छक न्यक तं प्याहाँ मवगु नं मखु । थौं वहे खाँ जीवन उपयोगी जुयो च्वना । पलापतिकं भ्रष्टाचार, लज्याहेमचः सिं घुस फवनिगु खाडः नुगलय् स्याक जक च्वडागु खाँ डाक्टर साहेवं धायो च्वन । मास्टर साहेव मुसुमुसु न्हयल जक च्वन ।

डाक्टर साहेवं धायोदिल -बांलाक ब्वँ प्रतिस्पर्धा खय् गुळ्ने लिचिलय् मतय् धःगु खाँयाता मार्गनिर्देश काथं ब्वड डाक्टर जुया, थौं थः म्हा आदर्श शिक्षकया अपरेशन थमनं याय् दःगुलि थःता गर्व जगु खाँ

प्वंकबलय् जिगु मिखालं हर्षया ख्वबी जाल । ख्वबी हुयला-महुयला या दोमनय् लाक च्वंगु मिखा कुनय जःगु ख्वबी प्याहाँ वयता उकुस मुकुस जुजुं भय् बियो बः वल । डाक्टरं साहेवं धायोदिल । कः कः सर छु जुला ? छाय् ख्वयो दियागु ?

जिं लिसः बिया थव हर्षाशु खः । छंता यक्व यक्व सुभाय् । जिं ब्वनामिपिन्ता न्हयाळ्ने धायगु जि बिरामी जूसा छुपुं डाक्टर जुयो च्वनिबलय् वास याइ । जिगु छँ दानयता छुपुं इञ्जिनियर जुयो नक्सा दय्की । जिता मुद्दा लगय्यासा छुपुं वकिल जुयो बहस याड बी । छुपुं जनताया सेवक जुयो सेवा याइ धायगु खाँ थौं छुं भाति जूसां सार्थक जगु मति वल । ख्वपया अग्रजपिसं 'छ्वा छँ छम्हा स्नातक पास जूम्हा मनू दय्केगु' नारा नपां ख्वपता ज्ञान विज्ञानया केन्द्र दय्केगु इच्छा चुलि जाजां वगु थें जुल । जिं डाक्टरया ख्वः स्व स्वं धाया- व हे सान्त्वनाया ख्वबी खः थव डाक्टर बाबु ।

डाक्टर साहेब छक न्हयल । थःगु मनय् सान्त्वनाया स्वं ह्वयक धंदा कायो दियमते छन्हूनेहू लिपा डिस्चार्ज याय् धाधां प्याहाँ वान । हकनं कोथाय् याकचा जि, जि याकचा कोथाय्, बुलुहुँ कापी कलम लिकाया हकनं वहे ख्वबीया मसीं भवँया छ्यलय् अतीतया खाँयाता न्हयबसा याड म्हेतय्गु ज्या न्हयाका ।


जनमत संग्रहया इलय् जि मचा ल्याम्हो चाम्हा, सःसां मससां वौचुगु चिं बहुदलया प्रचारे जुयागु, ४२ सालया सत्याग्रहखय् ब्वति कायो पुलिसया मार न नं थाय् थासय्या खोरय् च्वडागु, ४६ सालया आन्दोलन, निसें गणतन्त्रया आन्दोलन, भूमिगत धःपुं माओवादीया अराजक गतिविधिया विरुद्धय् ल्वाडागु, गणतन्त्रया आन्दोलन धाधां 'सडेगलेको दरबारलाई एक धक्का अर्को दे' धाधां जुलुसय् ब्वति कायागु अलय् थाय्थासय् साहित्य गोष्ठी खय्

प्रगतिशील साहित्यत ब्वड त्याकागु सिरपां जिता अः हिस्याडच्वं थें च्वन । थौं गणतन्त्रया हासा फयो जनताया हिचःति खय् थःगु स्वार्थया काँपिड न्हम्हा जुजुया ताण्डब क्यड च्वन । जनताया आशाया मता च्याइगु आशाया मता थौं चिकं नं फू, मतानंसी धाय् थें जुयो च्वन । अत्याचारया पखः नं गुली तः जगु जुई । पुँजीवादी धुं जनताता ख्याजक ख्याड थः दखय् स्वकः च्वन । साम, दाम, दण्ड, भेद फुक्क फुक्क छ्यलः जनता थः दखय् स्वकः च्वन । अज्ञानताया मिखापिडक ई लं जनताता नाखय् मिखा कांक च्वन ।

भवँतय् क्वथिडक स्वयो च्वडागुमिखा चाकहिडक स्वया बलय् गना छम्हा म्हालिंचां पाँटी च्वाप्व ज्वड नयो बिल । जि थाराक्क हे वान । नुगहे भारा भारा मिन । गनां जिगु म्हागस नं वहे म्हालिंचां थें नइगु खःला ?

जनताया म्हागस, ज्या साडागु काथंया ज्याला, समाजवादया आशा म्हागसय् म्हांगुथें जुडगुला दक मन ग्याड च्वंगु खः ।

थौं काय् भाजु त्यलं हे अस्पतालय् वल । अलय् धाल- थौं बायाता डिस्चार्ज यात । अः भ्नी छँ वानय्गु काय्या ख्वः पुन्हीया तिमिलाथें चकां । अलय् सामानत फुक्क प्वः चित । थौं जिता नं म्हा योगु थें हे जुल । उब्ले डाक्टर बाबु भाल । डाक्टरं थमनं अपरेशनया चार्ज मकसें गुरु दक्षिणा पुलागु पौ च्वयो तकगु जुयो च्वना । अलय् जिगु उपचारय् वासया धेबा नं वं हे मिलय् याड ब्यगु जुयो च्वना । जिं छुं हे धाय् मफूत । जिम्हा शिष्य, अर्जुन खला ? एकलब्य, थौं या पुँजीवादी थव ब्यवस्थाय् थकय् धेबा छिकाय् मता आदर्शया पुसा ह्वलागु थौं बुयो वगु थें कन्हय् सैगु मतिं जिं छँ पाखय् पला छिडा । लिपा लासां आदर्शया पुसा ह्वलय् धुंकल । छन्हू गथे चुलि जायो मवई ।



डयगुगु स्वप पौ. बःछि पौ(पाक्षिक)

प्रा. माणिकलाल श्रेष्ठया

लुमन्ति

आशा कुमार चिकंबञ्जार

वयकलं थुगु साफू चवयो नेपाल भाषाया एम.ए. कक्षा न्ह्याकयता योगदान याड द्यूगु खाँ न्यडा । श्व वयकया भाषाप्रतिया अनुराग खः धात्थे धाय्गु खःसा पाठ्यक्रम नं दय्कः पाठ्यपुस्तक नं चवयो हानं विषयथमनं ब्वंकय्गु म्हवचागु योगदान धात्थे हे धाय् फै मखु ।

छन्हू जिं थःगु ज्या विशेषं कलेज वानयमखां । वयकया योजना काथं उखुनुं न्हूगु पाठ ब्वंकय्गु मति । 'माक्सवादी साहित्य' या विषय । क्लासय् उलि ब्वनामिपुं दःगु नं मखु । वयकलं थय्क मिखा वाय्क दिल हँ । आना जि मरु । वयकलं छत्थुं हे पाठयोजना हिड्क दिल हँ । अले धैदिल हँ - ग्व चिकंबञ्ज ? छिमिसं थुइ मखु श्व विषय । वं अलय् छिमित थुइका बिइ । ब्वनामि पासापुं छत्थुं हे अजु चाया हँ । जि नेन्हू स्वन्हू मवाडा । सरं पाठ न्ह्याक हे मदी । तः न्हू लिपा जि क्लासे खानय् वं हे धायोदिल - ए हिरो । ब्वनय् म्वा, चा चा जक हिला जु छ ... । ' जिगु नुगलय् बाणं कय्कगु थें हे सुल । जिं सरयाता जि B.L. या जाँच बियो चवडागु खाँ काडा । वयक लय्ताल । वयकलं Constitutiona law खय् L.L.M. पास याडागु खाँ काड दिल । कक्षाय् न्हंगु विषय सुरु याड दिल । माक्सवादी साहित्य छपु राजकुमार दिक्पालया बाखं कना उदाहरण ततं ब्वंकः द्यूगु खाँ अः नं जिके लुमाड वनि । सन्तान मरुम्हा जुजुयाता छम्हा ऋषिं सन्तान दय्क बियगु तर हिं न्यदा दतकीं थमनं कः वय्गु बाचा याक, राजकुमार दिक्पाल बुयो हिं न्यदा दय्क व ऋषि कः वबलय् सर्वसाधारण जनताया काय् बियो छवत । वहे राजकुमार जुइ दक ऋषिं नेपु लाँ दःगु दोकाय् श्वनय् वं परीक्षा काल । छपु लाँ जड्गलया लाँ ग्यापुगु लाँचिच्या हाक, मेगु लाँ ताः हा अथे ग्यापु मजु । गुगु लाँ वानय्गु ? दक न्यं बलय् जियां ग्यापुगु लाँ वानय्म्हा मखु । ताः हाकगु ग्यापु मजुगु लाँ वानय् धः बलय् श्व राजकुमार खै हे मखु धायो लितातय् यंकल । अलय् धात्थेम्हा राजकुमार मब्यसा सरा बिय धःबलय् ग्याड बियो छवत । वहे लायँ थयं बलय् राजकुमारं जि ग्यापुगु लाँ हे वानय्गु धः सेलिं श्व सक्कलीम्हा राजकुमार खः धायो यंकगु खाँ या समालोचना याड दिसे धायो दिल - साहित्य प्रगतिशील व प्रतिक्रियावादी दैगुलिं प्रतिक्रियावादी साहित्यं जुजुया काय् म्हाय् पुं पराक्रमी, धीर,

जीवनय् आखः ब्वनय्गु इवलय् अपलं गुरुपुं नपां ब्वनय न्याडा । अपलं गुरुपिनिगु बचं कायो अनेक विषय ब्वनय् न्याडा । छम्हा मनु ब्वलांकय्ता, सक्षम याय्ता अपलं गुरुपिनिगु त्याग, तपस्या अभ्र धाय् बलिदान दैगु खाँ यक्वसिनं सियानं मथू थें, मखु थें च्वंकः च्वनि । थः हे सक्षम जुयागुया घमण्डया खाँगवः प्वंकः फलाना मास्टर बाँमला । वं ब्वंकगु छुं हे मथुया । जिं हे ब्वड पास याडागु खः । आदि आदि खाँ ल्हाड घमण्डया पर्व हे दय्की । अलय् गुलि सिनं फलानाम्हा मास्टर जिम्हा दक्कलय् योम्हा सर । छाय् छाय् व जिता यो । अनेक खाँ कानी । श्व मानवीय स्वभाव आइन्स्टाइनया सापेक्षतावाद नपां ज्वः लागु खः ला वा न्यूटनया शक्ति सिद्धान्त नपां ज्वलागु खः जिं मसिया । अथेनं जिता प्रा. माणिकलाल श्रेष्ठ जु तस्कं यो । वयकया ब्वंकिगु पहः वयकया ब्यक्तित्व, वयकया विषयगत ज्ञान (Confidence) जिता तस्कं हे यो ।

जि पाटन संयुक्त क्याम्पसय् नेपाल भाषा एम.ए. ब्वडाबलय् २०५१-०५२ ब्याचया छम्हा बांलाम्हा ब्वनामि जक फुकक धाय्थें गुरु-गुरुमां पिसं धायो दी । जि फुरुङ्ग जुय । पासापिसं धाई सकसिया योम्हा विद्यार्थी, जिगु न्हायँ तपुई । छगू न्यगू यायां अन्तिम पः वई । माणिकलाल सर द्रहँ भाई । वहे शौम्य ख्वः ज्वड । चस्मा थाकायो म्हवस्तय तक जक तयो दी । अलय् आखः ब्वनय् मालकी म्हवस छक सांक दी । चस्मा ख्वात न्हासय् क्वकाई । वहे पहः वहे ढङ्गं छसिकाथं हःनय्या खाँ लिपिपिं ब्वडक दी । छन्हू-नेन्हूस्वन्हू तक । अः श्व घाइ धाय्गु खाँ जिमिगु नुगलय् जाय् धुंकी अलय् हःनय्या पाठ भातिचा त्वःति लिउनेया पाठ न्ह्याकी । वहे काथं छगू टेप रिकर्ड थें धारा प्रवाह-छतिं हे मपाक ब्वंकदी (History of English Literature) अंग्रेजी साहित्यया इतिहास । नेगुगु तगिलय् (Criticism) समालोचनाया सिद्धान्त । नेपाल भाषाया एम.ए. तगिया स्वीकृति वियता समालोचनाया साफू मरुगुलिं



ड्यगुगु स्वप पौ. बःछि पौ(पाक्षिक)

वीर दक, कानी, चवई । सर्वसाधारण जनताता भाग्यया दोष क्यँ क्यँ कायर, ग्याफारा जक क्यनि धायो धवाथुडक कांगु खॉ थौ नं जिगु नुगल्य दः नि ।

वहे शौम्य मुद्रा थःगु हे मतापं साभाबसं क्वहँ भायो पाटन संयुक्त क्याम्पसया लाकौल-चैन भवनय् द्वहँ भाई । अलय् जि गना चवड चवना आना थयंक स्वः भाई । अलय् लाहातय् साफू छगू ज्वड भःगु जिता ब्यू ब्यू धायो दी -अय् हिरो न्हापा याय्गु साफू ब्वनय् धुनला ? नाः अः थव न्हूंगु संस्करण वगु धा धां प्रजग कोरियाया का. किम इल सुडया 'यस शताब्दी संग' धःगु साफू छगू बियो दी । मे पिसं इर्ष्या याई । सायद कोर्स बुकला दक । सय छु साफू दक कायो स्वई । छत्थुं हे पं खवः ज्याइ । राजनीतिक साफू ला ? धाई । ओहो गजगु संस्कार देया बुद्धिजीवी धःपुं, एम.ए. तगिलय् ब्वड च्वंपिसं यागु राजनीतिक वितृष्णां मनय् अनेक खॉ ल्हाइ । धात्थे दे गखय् वानिगु जुई दक । उकिमध्ये अः गुम्हां नेपाली कांग्रेस व एमाले पार्टीया समर्थक जक नपालाइ बलय खॉ कानी । राजनीतिया अर्थ कम्युनिष्टया आचरण छु हे छु हे मूथ । अथेनं सुयातां भोट बियगु मदयो भुट्टा आशवासनय् भोट बियागु खॉ अःनं कानि बलय् माणिकलाल सरं 'छिमिसं मार्क्सवादी साहित्य' ब्वनिमखु धःगु भस्स भस्स लुमांसे व र नेपाल मजदुर किसान पार्टीया थी थी ज्या इवः, नेपाल भाषा साहित्य तः मुंज्याया नायो नं जुय धुम्हा जि हाने बहम्हा नेपाल मजदुर किसान पार्टीया नायो नारायण मान बिजुकुँजुया शिष्य जुइ धाय्गु मतिं वयकया कार्यकर्ता तयता वैचारिक रुपं पोख्त याड ब्वलाकिगु स्वयो हे माणिक सरं जिता अथे धःगु जुइ धाय्गु मति अः तिनि वाना ।

छगू छगू क्याम्पसय् छगू छगू साहित्य पाला पिथानिगु । भक्तपुर क्याम्पसय् 'सुथ' साहित्य पाला पिथानु इलय् जिगु साहित्यखय् राजनीति बल । धायो न्हःपां छापय् मयासें व खवः थवखवः मरुगु साहित्य बियो छापय् याकागुलिं थौं नं जिता गिजय याड च्वंगु थें ताय्का । लिपाया सुथः साहित्य पालाय् समाः नां या च्वखं छापे यायता रत्नवीर किसीसरपुं ल्वाड हे तय्कगु जिके लुमांसे वः । वहे खॉ पाटन संयुक्त क्याम्पसया कुलां साहित्य पालाय् समाज नांया च्वखं दुथ्याकयता नं अथेहे हालय् माल । भाषा व साहित्य राजनीति अलग जुइ मखु धाय्गु हरि बहादुर श्रेष्ठ (का.रोहित) जु या खॉ मथुयो वा थुडकय्गु मति मतयो थौं भी स्वनिगः या नेवः तय्गु छँ थुडः, बुँ सितिकं कायो, फास्टट्रयाक व स्मार्ट सिटीया खवपा पुयो वयो च्वंगु दः । व घण्टाकर्ण नं सर्वसाधारण जनताया मचा तयता हे यंकला हँ, व गुरुं मापा लाखें नं तिनिखल्य च्वड सर्वसाधारण ता हे दुःख बिला हँ । थौं थजपुं राक्षस त जनता मारा कानुन जुयो वयो च्वंगुलि माणिक सरं धायो द्यूगु खॉ थाना न्हि थानय् बहः जुई ताय्का -'थःतः मार्क्सवादी धाइपिसं छुं छगू भाषायात

'राष्ट्रभाषा' राज्य भाषा, सम्पर्क भाषा, न्ह्यागु हे नां तया नं जुइमाः धाय्गु, उकियात सकसिनं काय्गु अनिवार्य धाय्गु अनिवार्य रुपं थुकियाता सकसिनं ब्वनय्मा ब्यवस्था जुइमा धाय्गु न्हिलय्मास्ती वैगु खँ खः । अथे धाइपिसं छु तर्कखं जि मस्य तर कम से कम व धारणा मार्क्सवादी मखु धकाः निं जिं धाय् फु । थवला अप्व, म्हवँ डिग्रीजक पागु फासिष्टवादया अभिव्यक्ति खः ।'

वयकलं ब्वंकःदि, स्पष्ट छसिकाथं खुसी बः व थें कथहं अलय् गनां गनां हे दिपः मरु । अलय् गुब्लें दिपः नं मरु । हिपः नं म्वः । व हे साभा बसय् टिकट कायो लाहातय् टिकट ज्वडं तुं तै । कलेज भाई ब्वंक दी । वहे बसं वहे मुद्राय ल्याहाँ भै । गुब्लें गुब्लें जिमिसं (कमला मानन्धर, सावित्री श्रेष्ठ व जि) ल्यूनय् नं कन्डक्टरं धेबा कः वइबलय् हःने च्वड द्यूम्हा माणिक सर याय्गु नं धेबा पुलय् । वयकं धेबा बिय तानकिं खलासिं छिगु धेबा बिल धाइ बलय् सुनं दक न्यनि बलय् जिमिता क्यनि । अलय् धायो दी -'अय् हिरो आम्वानी गुलि दु हँ ? मतिनां जःगु वहे खँवः, व हे खॉपु थौं नं जिगु मानसपतलय् ल्यं ब्यो च्वंगु दः । नुगः हिइसे च्वंकः त्वः फिडकय हे मफयागु खॉ यां अय्हिरो, ब्वनय् म्वाला छं ? पि.एच डि याय् म्वाला ? जि मदयानि तिनी सिइका छं ।' धात्थे थौं वहे खॉवल्, वहे खॉपुखं थौं छुलिं सुय थें सूवयो च्वना । छम्हा धात्थेम्हा मास्तर साहेव जि योम्हा मध्ये छम्हा गुरुवर मां भाषाया अभियन्ता, मार्क्सवादी चिन्तक थौं छिं जिता न्वः भाइ मखुत । हकनं धःभाइ मखुत । छगू काथंया जिम्हा लॉजुव छि जिता मार्ग निर्देश नं यो भाइ मखुत । छिगु व डाखाछँ थौं थाय् सियानं छँ मसिया धःथे जुइगु जुल । इलय् ब्यलय् वयो छिकय् सल्लाह कः वय्गु जिगु लॉपु हे चबुत ।

छितः दुनुगलं निसें बिचः हाय्क, छिं धायो तकगु खॉ कुलः लुमांकः पचिःपचि याड जूसां हज्याय्गु बचं प्वंकः च्वडा । हकनं छक छिगू धापु न्हिथाड च्वडा । - 'विश्वया दकलय न्हापांया सर्वहारा राज्य सोभियत संघया स्थापना लेनिनं या बलय् छुं छगू भाषायात राष्ट्रभाषा धकाः घोषणामयाः राज्य भाषा अझ सम्पर्क भाषा तकनं गुगु यात मयाः अझ न्हापा छगू भाषा यात 'राज्यभाषा' धक घोषणा याना तःगु नपां खारेज यात । अथे हे जनगणतन्त्र चीनया स्थापना याना दीम्ह माओत्सेतुडं सच्छीखय् गुइगु प्रतिशतं मयाक्क जनतां ल्हाइगु भाय् दतं नं उकियात राज्यभाषा, सम्पर्क भाषा मया, देशया फुक्क जनतां व भाय् अनिवार्य रुपं सय्केमाः मधाः सकसिनं थः थः भाषां हे ब्वनि, सय्की, थः थः गु भाषाया माध्यमं मःगु ब्यवहार चले याई धकाः धाल । सम्पर्क भाषा धकाः राज्य वा पार्टी गुगु भाय्यात घोषणा याय्मज्यू सिफारिस तक नं याय् मज्यू । लेनिनं-माओ नं छको-निको मखु तकौ न्वखकं धायो द्यूगु दु ।' माणिक सर ! छितः दुनुगलं निसें बिचाः हाय्का । व स्ववाहा भगवती वया छिगु प्राण मदुगु म्ह स्व स्वं निफूति ख्वबी हाय्का ।



बिस्का नखा व घातु म्ये

आशा कुमार चिकंबजार

हलिमय मनूया सभ्यतां कुडकः याड वयो च्वंगु जात्रा अल्याख दः । ल्याखाय हे थाकुः थः थः गु थाय् बाय् भौगोलिक बनावट, मनुखं कुबियो वगु संस्कार-संस्कृति, मनूया नुगः दुनय् म्वाड च्वंगु विश्वास, धार्मिक आस्था अनेक काथं जात्रा न्ह्याक, डाय्क वयो च्वंगु दः । अलय् वहे जात्रा नपां थी थी जात-जातिया थः थः गु म्हासिडका कला, सीप व थः थाय् दःगु सामग्रीत छ्यलः जात्राया रौनकता पिब्वयो वयो च्वनि ।

नेपःया अपलं जात्राखय् जाति विशेषया थःगु मौलिक पहः नपां थः थः गु बिस्कं पहः पिब्वयो वयो च्वंगु दः । उकि मध्ये नेपः गालय् स्वनिगः या नेवः तय्गु जात्रा हलिमय तस्कं लोकं हवा । उकि मध्ये स्वनिगलय् याँ सेतोमच्छिन्द्र नाथया खः व ईन्द्र जात्राबलय् या कुमारी नपां या खः, यलया करुणामय्या जात्राया खः नपां ख्वपया बिस्का जात्राया भैल खः तस्कं लोकं हवागु जात्रा नपां घःमा दःगु खःया जात्रा खः ।

इतिहासविद लीलाभक्त मुनकःमि जुया धापु काथं थुगु बिस्का जात्रा गुब्ले निसें डाय्कला ? धाय् थाकु । थानाया ल्योसीं थानय्गु जात्रा परापूर्वकालय् निसें दःगु अथे धाय्गु लिच्छवीकालय् निसें दःगु नाग नागिनी सिगु नपां स्वाय् हयो लिपा जुजुं अप्रभंश जुयो (बिस्केट) बिस्का नखाजुल धःगु नं किम्वदन्ती दः ।

मल्लकालय् थुगु थाय् तस्कं तान्त्रिक जूगु व उगु इलय्या ग्रन्थखय् विश्वकेटु जात्रा, बैशाख महिनाय् सूर्य मेष राशि खय् वानिगुलिं मेष संक्रान्ति जात्रा दक नं धायो तःगु खानय् दः । अथेहे थुगु जात्रा विक्रम सम्वतया सौरमासया न्हापांगु दिनय् क्वचाडगु जूगुलिं थानाया मनूतय्सं बैशाख संक्रान्ति जात्रा जक नं धः । अलय् थुगु जात्रा स्वतः धःसा शत्रु नास जुडगुलिं शत्रु हन्त जात्रा दक नं धायो च्वंगु दः । (बिस्केट जात्राको संस्कृति पाखं)

थानाया अनेक किम्वदन्ती मध्ये राजकुमारीया न्हासं प्याहाँ व पुं सर्प न्हिं छम्हा राजकुमार पिन्ता स्यागु अलय् छम्हा बुहीम्हा ध्वमां छम्हा प्रतापी राजकुमारता खुसी लुयो वगु खड्ग ज्वड राजदरबारे वाड राजकुमारीया न्हासं प्याहाँ वैपुं बीं (सर्प) स्याड ब्यू धः काथं वहे राजकुमार वाड बीं स्याड डय् डाकु हाकगु थासी माया सिमाय् यखायो जात्रा यागु नपां नं स्वाय् दः । अलय् उगु ल्योसिंछोक्य हलिपतः उम्हा नागनागिनया प्रतिक काथं हलिपत छगू ३५ कु हागु मेगु ३४ कु हाकगु छज्वः तैगु चलन अः नं दःनि । उगु थाय् ल्योसिंछो खः । उगु ल्योसिंछो चित्तपोलया ल्योसिंगुंइतं तान्त्रिक पद्धति काथं पुजा बली बियो ल्योसिं थयो है । उब्ले छगू त्वः या

फुक्कवाड लुयो हैगु अः आधुनिक मेसिन (डोजर) घ्वाड ह्यगु यात । उगु ल्योसिं चैत्र मसान्त खुनुं ल्योसिंगालय् हयो थानिगु याई । गुकी छ्यलिगु च्यापु वलें, अष्ट मातृकाया प्रतिक काथं कायो तःगु दः । ल्योसिं थानय्ता भैलखः व नकिंजु खचा नं ल्योसिंछयलय् महःसिं मगा । हः सय् व हाईसय्या सलं हपः बियो न्ह्याकिगु भैलखः थानिगु ल्योसिं व हिसिचा दःगु बः चाहांगु नकिंजु खचा फुक्क फुक्क स्वय हाँय पु । छगू रस रंगं जः ।

ल्योसिं दानय् धुंकः थाय् थासय्या दाफा-भजनय् उत्सवया लसतां भजन हाली । सम्हय नै, साति खुनुं देसां देछिया धिमे बाजा, धाँ बाजा, बाँसुरी पुयो चुपीं गालय् ख्वः स्यू वै । अः चुपीं गालय् न्ह्याड च्व.गु खोँहि (हनुमन्ते) खुसी फोहर जूसेलिं मेगु हे ट्याडकीया नाः खय् मिखा पियगु जक याड हल ।

नखाया लसताय् फयां फक्व बांलाकः न्हँगु नं फियो मचात, मिसात-मिजंत थः ब्वयदः कत स्वयदः धाधां चुपीं गालय् ख्वः स्यू वयो भैरवनाथ, बेतः द्यो, ल्योसिंछो नकींजु अजिमा दरशन याड मनयाता शान्त याई । धात्थें थुगु शत्रु हन्त जात्राया महिमा काथं दाच्छी तक शत्रु थिय फै मखुत जक मन प्वः चिई । गुम्हासीं थुगुसीया ल्योसिं स्वयखान दक बुहाबुही पिनी मन हवय्की । अथेनं इतिहास प्वलः स्वय्गु खःसा राणा कालय् भारा वानिगु खोँ लुमांकय् बहःजु । गुगु इलय् नकतिनि इहिपा जूपुं मिजं मनूतय्ता भारा माहां नं लुतुलुयो हेटौडाय् सिं कुबिडकय् यंकिगु इलय् थजगु नखाः चखाः अलय् छँ लुमांकः म्यँ हालय्गु याई । थुगु इलय् हालिगु म्ये याता 'घातु म्यँ' जक धाई ।

भाजु सत्यमोहन जोशी जु या धापु काथं - "प्रायः न्ह्यागु जातिया भाषाय् नं लोकम्यँयागु प्रादुर्भाय व प्रधानता खनेदई । मेगु ला छु, लिपि व साहित्य मदुगु भाषाय् नपां लोक म्यँ ल्यं ल्यं पुया च्वंगु खानय् दु । भीगु थें जागु प्राचीन लिपि व साहित्य दूगु भाषाय् जा लोकम्यँ आपालं दैगु हे जुल । तर दुःख या खँ श्वहे जुल भीसं भीगु लोकम्यँ धैगु बांलाक म्हासी के मफया च्वन, न्यनेहे नं मदैथें जुया वया च्वन । वास्तवय् भीसं भीगु लोकम्यँयागु क्रमवद्वरुपं अध्ययन अन्वेषण याय्गु ज्या इवः न्ह्याकय् नं मफयाच्वनातिनि भीगु माँ भाषाय् लोकम्ये दु ला कि मदु, थजागु खँतक नं मस्य मथू धइगु स्थितिइ लाका च्वनेमाः पिं नं गनं गनं खनेदु ।" - (सत्य मोहन जोशीया च्वखं मुना ।)

लोकम्यँ ऋतु काथं हालय्गु याई । छगू खास ऋतुई हालिगु लोक म्यँ मेगु ऋतुखय् हालय्गु चलन मरु गथेकी असारया



डयगुगुगु स्वप पौ. बःछि पौ(पाक्षिक)

सिन्हाज्या गुन्हीपुन्ही, जन्या बलय्या हिसी ख्याली, वसन्त ऋतुं हालिगु वसन्तया म्येँ, मोहनी बलय् हालिगु मालश्री, होलीया म्येँ, बिस्का या घातु धाय्थेँ थौं कन्ह्य् थजगु ऋतु म्येँ या महत्व नं मथुयो वांथेँ च्वड वल । ब्यांचुली सुथाय् जक हालय् माल ।

थथेँ लोक म्येँ दुनय् न्हिली, ख्याली, ध्याचु, दुःख सुख प्वंक च्वनि । घातु म्येँ करुण रसय् थःगु नुगःखाँ दुःख प्वंकः हालय्गु या । थव ख्वपय् बिस्का बलय् यँ यलय् पाहां चहेबलय् हालय्गु याई । गथेकि-

गना वानय् गना च्वनय् ?

च्वनय् थासं मदु दैब ...

राम हँ जि गना वानय् ?

नययात नसा मरु, तिय याता वस मरु

च्वनय्यात बास जिनं मरु । राम हँ जि गना वानय् ?

पुलांगु घातु म्येँ स्वयबलय् गुगुं म्येँ यौवनया मानसिक दुःखं हालः तगु खःसा गुगुं म्येँ विछोड विरहया नं दः । गथे कि-

थथिं जागु रस रंग तोल ताव हरि जि गन वने ॥धु॥

मचा बेलसं रस जिनं मसियाव

चान्हँ न्हिनं म्हितल जि जुया ॥१॥

गना वने गना च्वने

वने थासः मदुप्रभू

गथे जागु करम ॥

थव मदु थिति मदु

सुयाके बिचः मदु

गथे जागु करम स चोसे हल

राम हँ जि गना वा

(१/२ सत्य मोहन जोशीया च्वखँ मुना सफूतिं साभार)

जात्राया हुल्य् ल्यासे

ल्याम्होया रसरंगया म्येँ नं हालेगु

या : । गथेकि-

हलिंपतः फर फर सांक

ल्योसिं थाड हल रे

स्वः वानय् नु ...

जात्रानपां नसा, त्वसा

नं वैगु पक्का हे जुल । थुगु

इलय् कःछँ व कय्गु तयो ब्वजा

नय्मःगु खाँ नं ल्हाड वहे काथं

नय्गु चलन पुलांगु पुस्तां त्वः

मफिडकनि । अथेहे ल्योसिंद्यो

स्वः वानिबलय् ग्वः ग्वयँ, लभं

न्याडनय् मःगु खाँ न. धायो

तःगु दः । गथेकि-

भैलखःस्ववानय् याता ग्वँलभं न्याय मालितिनि

जिकय् धःसा धेबा मरुनि कायो ह्य मानि

आसे दाइचा ॥

संस्कृति कः घाड सभ्यताया ताकि गय्केगु इवल्य् स्वताक्क कय् च्याड मनूयाता ई वांगु मचाय्क डाय्की । ऋतुपतिकं बिस्कं पहया सबः काय्कं काय्कं लोकलयया सबः लय् मनूत लोक नृत्य याड प्याखं ख्वायँ कायो जुई । लोकबाज्या धुनय् थः ताड थःमनं लोक बाजा कःघाडः जुनी हाडः च्वनि मनू तय्सं । घातु हालः थजु, मालश्री हालः थःजु थःगु लोक संस्कार डालय् मखांसा थःसी मनू थें जुइगु ताय्कः वं थःगु जिवय्या अड्गु थें, थःगु संस्कृतिया ख्वःपा पुयो कपः धस्वाकः थःगु जातीय पहिचान क्यँ क्यँ व पिठवयो च्वनि । चाहे व लोक म्येँ, लोक बाखं, लोक नृत्य, लोक संस्कृति हे थजू म्हेगया पुखां दयक तकगु सम्पति भीगु कला व संस्कृति' या नारा ज्वड स्याचुगु पला छिड च्वनि । अजनं दुनुगलं निसें घातु हाली - थथिं जागु रस रंग त्वल ताव राम हँ, जि गना वानय ?

धात्थेँ नेवः संस्कृतिया रसरंग जक मखु थुकिया वैज्ञानिक तथ्य नं उलि हे ज्वःला, बांला दक अपलं विदेशीपिसं पि.एच.डि याय्गु इवल्य् च्वयो वांगु दः । बिस्का जात्रा नं पुखां त्वः त तकगु संस्कृति जूगुलिं थुकी दुनय्या महत्व थौं अनुसन्धानया विषय जुय फः । थुकी दुनय्या पात्रत भैल द्यो, नकिंजु अजिमा, बेतःद्यो, लाहा दःम्हा व मरुम्हा ल्योसिं द्यो, अलय् नाग-नागिनया प्रतीक हलिंपतः या विश्व ध्वजा फुक्क फुक्कया चरित्र चित्रण छगू शिक्षा जुयफः । वहे मानवेतर पात्रया छगू छगू किम्बदन्ती उगु इलय्या इतिहासया दसी जुयफः । वहे लोक म्येँ थौया युग याता छगू शिक्षा जुयफः ।



खप नगरपालिकाया ज्या भवः त

सक्षम साकोसभौतया भ्रमण पुचः खप नगरपालिकाय्

चैत्र १४



प्रशिक्षण, स्वास्थ्य शिविर थजगु ज्या इवःत न्ह्याकः अपलं जनताता राजनैतिक रुपं सचेत याड छप्पा छधि यायगु ज्या याड वयो च्वंगु खाँ नं ब्याक दिल ।

खपया सहकारी संस्थातयगु बदनानाम जगु धायगु हे खप दे भःरि या बदनानाम जूइगुलिं सहकारी संस्था तयसं सामाजिक उत्तरदायित्व कः घाड इमान्दारी जुयो ज्या यायता सहकारी संस्थातयता मार्गनिर्देश याड वयागु खाँ नं ब्याक दिल ।

खप नगरपालिका वडा नं. २ या वडाध्यक्ष नपां सहकारी समितिया कजि हरि प्रसाद बासुकला जुं खप नगरपालिका पाखं दयकः तःगु सहकारी समिति पाखं याड वयो च्वंगु ज्या इवः त काड

खप नगरपालिकाया प्रमुख सुनिल प्रजापति जु नपां सक्षम बचत व ऋण सहकारी संस्थान लि. भौत या नायो भाजु रमेश काजी श्रेष्ठया न्हयलुवाय् भ्रगु पुचःलं नपालायगु इवलय् खप नगरपालिकां शिक्षा, स्वास्थ्य, सम्पदा ल्हवनय् कानय् व दानयगु ज्या यासे भौगु थःगु हे मौलिक पहलय् म्वाकः तयगु, विकास निर्माण सहकारी गतिविधि थजगु थी थी विषय सं छलफल यासे थः थः गु अनुभव कानयगु ज्या जुल ।

उगु भ्रमण पुचः ता खप नगरपालिकाय् लसकुस यासे नगर प्रमुख प्रजापति जुं धेबाया कालबिल याडगु थासय् आर्थिक अनियमितता, भ्रष्टाचार जुइगु अपलं सम्भावना दैगुलीं आर्थिक लागाय् पारदर्शी ढंगं ज्या सानय् मः धायो दिल ।

ज्या सानय् फःपुं सक्षम स्थानीय तहता विश्व विद्यालय चाय्के बियमःगुलि बः ब्यूसे खप नगरपालिकां नगरबासी ब्वनामिपिनिगु लागिं शैक्षिक ऋण बियागु दांकः भिकः गुणास्तरीय शिक्षा ब्यू ब्यू वयो च्वंगु नपां सुचुकुचु खय् विशेष ध्यान तयो वयो च्वंगु खाँ ब्याक दिल । वयकलं भौगु थः गु पहः भौगु मौलिकता म्वाकः तय मफूसा थःगु म्हासिइका हे तानिगु खतरा दः धायोदिसे सहकारी संस्थातयसं थःपुं दुजः पिनिगु सांस्कृतिक स्तर थाकायता सेवा भावं सेवा याय्मः धायो दिल ।

छलफलया इवलय् न्यंगु न्हयसःया लिस बियो दिसे प्रमुख प्रजापति जुं खपया सहकारी संस्थातयसं थी थी लाहातय् ज्या दैगु सीप व रोजगारी मूलक तालिम, अन्तरक्रिया, राजनीतिक विषयया

दिसे खप नगरपालिका दुनय् च्वंगु सहकारी संस्था तयगु अवस्था सिइकयता बराबर अनुगमन याड वयागु खाँ ब्याक दिल । सहकारी संस्था तयता उत्पादन जुइगु लागाय् लगानी यायता ग्वाकः च्वडागु नपां खप नगरपालिका अजगु सहकारीता अनुदानया ब्यवस्था नं याड वयागु खाँ ब्याक दिल ।

सक्षम साकोसया नायो रमेश काजी श्रेष्ठ जुं खपया सांस्कृतिक सम्पदा म्वाक, भिकः तयगुलि खप नगरपालिकां च्वछाय्बहगु ज्या याड वयो च्वंगु नपां खप नगरपालिकां शिक्षा, स्वास्थ्य थजगु थासय् नपां थी थी लागाय् याड वयो च्वंगु ज्याखं थः पिसं नं सय्के चाहे जगु व सक्षम साकोस मेगु साकोस स्वयो बिस्कं पह ज्वडः सामाजिक उत्तरदायित्व ज्वडः हज्याड च्वंगु खाँ ब्याक दिल ।

खप नगरपालिका वडा नं. ९ या वडाध्यक्ष रविन्द्र ज्याख्व जुं न्ह्याकगु उगु नापालायगु व छलफल ज्याइवः खय् साकोसय् प्रतिनिधिपिसं खप नगरपालिकाया ज्या इवः बारे थः थः गु जिज्ञासात तःगु खः ।

नपालायगु ज्या इवःलिपा सक्षम साकोसया प्रतिनिधिपुचःता खपया ऐतिहासिक व सांस्कृतिक महत्व कः घाड च्वंगु सम्पदा क्षेत्रय ब्वड यंकः क्यड दिल । नपां वयक पिन्ता नगर प्रमुख प्रजापति जुं खप नगरपालिकाया पिथनात उपहार काथं लः ल्हाडः बियो द्यूगु खः । उगु भ्रमण पुचः ता खप नगरपालिका वडा नं. २ या वडाध्यक्ष नपां सहकारी समितिया कजि हरिप्रसाद बासुकला जुं खादा क्वखाय्क लसकुस याड द्यूगु खः ।

का.रोहित नपां यलया प्रमुख चिरिबाबु महर्जन



चैत १८

नेपाल मजदुर किसान पार्टीया नायो नारायणमान बिजुक्छे जू नपां यल महानगरपालिकाया प्रमुख चिरिबाबु महर्जन जुं बिजुक्छे जुया निवासय नपा लाड यल महानगरपालिकां याड च्वंगु थी थी ज्याइवः नपां थौं कन्हेया समसामयिक विषय खाँ ल्हाड दिल ।

नपालायगु इवलय नायो बिजुक्छे जुं जनप्रतिनिधिपुं जनताप्रति उत्तरदायी ज्युमःगु नपां जनप्रतिनिधिपिसं इमान्दारीपूर्वक देश व जनताया सेवा याःसा जनतां सुख सिङ्गु खाँ ब्याक दिल ।

(पुलांगु) प्राचीन व ऐतिहासिक दे (सहर) व सम्पदा लागाय् तः तः ग्वगु ज्यातुगु सवारी साधन दुमकाय् मःगु व व्यवस्थित रुपं भिंक व बांलाक ज्या सांकय्ता नगरपालिकाय् ज्या सानिपुं निरीक्षकपिन्ता इन्जिनियरिड तालिम बिय मःगु खाँ नायो बिजुक्छे जुं ब्याक दिल । वयकलं पुलांगु

भीगु थःगु हे सीप व प्रविधित ल्यंकः तयमःगु खाँ ब्याकसे भाषा व साहित्यया लागाय् ज्या सानिपिन्ता वयकपिनिगु योगदान व ब्यक्तित्वयाता हना बना याड नगरपालिकां विशेष ध्यान बियमः धायोदिल ।

नपालायगु इवलय यल महानगरपालिकाया प्रमुख चिरिबाबु महर्जन जुं खप नगरपालिकां शिक्षा व स्वास्थ्यया लागाय् देशया नितिं च्वछाय् बहगु ब्वसेलागु ज्या याड च्वंगु व यल महानगरपालिकां सम्पदा-बस्ती ल्यंकः संरक्षण याय्गु मतिं मः काथंया नीति नियमत दय्क हज्याड च्वंगु खाँ ब्याक दिल ।

यल देशय् सम्पदा ल्यंकः म्वाकः तय्ता महानगरपालिकां याड च्वंगु खाँ ब्याकसे प्रमुख महर्जन जुं सम्पदा ल्हवनय् कानय् व दानय्गु ज्या खय् ठेकेदारपिन्ता स्वयो स्थानीय उपभोक्ता समिति पाखं ज्या याकय् मःगुलि महानगरपालिकां मदिकक बः याड वयो च्वंगु खाँ ब्याक दिल । उगु नपालायगु ज्या इवः

खय् खप नगरपालिकाया प्रमुख सुनिल प्रजापति जु नं भःगु खः ।

नायो बिजुक्छे जुं नेपाल मजदुर किसान पार्टीया पिथनात 'मतिनाया चिं' काथं प्रमुख महर्जन जू याता लः ल्हाडः द्युगु खःसा प्रमुख महर्जन जुं नं वयकता नेगू प्यंगू पिथनात उपहार काथं लः ल्हाड द्युगु खः ।

नपालायगु ज्या इवः लिपा खप नगरपालिकाया सभाकक्ष भायो खप नगरपालिकाया प्रमुख सुनिल प्रजापति जु व यल महानगरपालिकाया प्रमुख चिरिबाबु महर्जन पिसं थःथःगु नगरपालिकाया ज्या इवःव अनुभवत काड दिल ।

यल महानगरपालिकां चाय्क च्वंगु संग्रहालय बांलाक न्ह्याकय्ता व महानगरं न्ह्याक वयो च्वंगु थी थी विषय सं वयकपिसं सल्हाबल्हा याड द्युगु खः । खप नगर प्रमुख सुनिल प्रजापति जुं प्रमुख महर्जन जू याता खपया लोकं ह्वागु 'म्हेवखा इयो' व नगरपालिकाया पिथना त 'मतिनाया चिं' काथं लःल्हाड द्युगु खः ।

स्वप नगरपालिकाता न्ह्याबले सफा, सुघर तय्गु सकल नगरवासीतय्गु कर्तव्य खः ।



डयगुगु खप पौ. बःछि पौ(पाक्षिक)

खप नगरपालिकाय् सुनवल नगरपालिकाया उप-प्रमुख जू

चैत्र १८

खप नगरपालिकाया प्रमुख सुनिल प्रजापति जु नपां नवलपरासीया सुनवल नगरपालिकाया उप-प्रमुख दधिराम अर्याल जु नपा लः भाल । नपालाय्गु इवलय् वयक पिनि दथुई नेगू नगरपालिकां याड च्वंगु शिक्षा, स्वास्थ्य, सम्पदा ल्हनय-कानय व दानय्गु ज्याखय् जुयो च्वंगु थी थी ज्या इवः या अनुभव काड दिल ।

नपालाय्गु इवलय् उप- प्रमुख अर्याल जुता खप नगरपालिकाया पिथता त उपहार काथं लः ल्हाडः दिल ।



खप नगरपालिका दुनय्या पसः व्यवसायीपुं मुंकल

चैत्र १८

खप नगरपालिकां नगरपालिका दुनय्या पसः व्यवसायीत मुंकः खप नगरपालिकां निस्वाड तःगु बजार अनुगमन समितिपाखं याड वयो च्वंगु ज्या इवः याबारे खाँ ब्याकल ।

उगु भेलासं खप नगरपालिकाया प्रमुख सुनिल प्रजापति जु आर्थिक अनुशासन व पारदर्शिता हे खप नगरपालिकाया पर्याय जूगु खाँ ब्याकसे खप नगरपालिकां थःगु तृतिखय् थः हे दानय् फय्केगु आत्मनिर्भरताखय् बः ब्यू ब्यूवयो च्वंगु खाँ नपां कतःया (विदेशी तय्गु) भरय् देश विकास जुडमखु धायोदिल ।

खप नगरपालिकां न्हयगू शैक्षिक संस्थात बांलाक न्ह्याकःवयो च्वंगु, दांकः भिंकः, बांलाक इञ्जिनियरिड, सिभिल थजगु विषयलय देशां देछिया ब्वनामिपिन्ता बांलागु भिंगु गुणस्तरीय शिक्षा ब्यू ब्यू वयो च्वंगु नपां स्वीकृति ब्यूसा विश्व विद्यालय चाय्केता नं नगरपालिका सक्षम जूगु खाँ ब्याक दिल ।

प्रमुख प्रजापति जुं नागरिकपिन्ता थःगु अधिकार व कर्तब्यया



खायँ सचेत याय्गु ज्याखय् नगरपालिकां बः बियो वयो च्वंगु अलय् कानुन हाचां गाथो जुइपिन्ता दण्ड-सजाय याइ धायो दिल । वयकलं खप नगरपालिकाया जनप्रतिनिधिपुं कर्मचारी पुं व नगरबासी पिनिगु मुंकः कुतलं नगरपालिकाया छगू छगू गतिविधि व्यवस्थित काथं बांलाक हःनय् यंकय्ता ग्वाहाली जुयो च्वंगु खाँ ब्याकसे जनप्रतिनिधिपुं जनताया सेवाखय् निस्वार्थ रुपं ज्या साड च्वंगु खाँ ब्याक दिल ।

भेलासं वडा नं. ३ या वडाध्यक्ष नपां बजार अनुगमन समितिया कजि राजकृष्ण गोरा जुं पसः व्यवसायिपिन्ता मुंकागुया मू उद्देश्य धाय्गु व्यवसायी व उपभोक्तापिन्ता इलय् हे सचेत यासे स्वस्थ प्रतिस्पर्धाकेया लागिं खः धायोदिल । वयकलं पसः व्यवसाय न्ह्याकय्ता दर्ता व नवीकरण मयासें मगागु खाँ ब्याकसे नगरपालिकाय् पुलय् मःगु कर नं नियमित पुलय् मःगु अलय् चिच्या- चिच्याहांगु पसःया व्यवसायीपुं छप्पा जुयमः धायोदिल ।

भेलासं अनुगमन समितिया नेम्हा दुजः वडाध्यक्ष हरिराम सुवाल व कार्यपालिकाया दुजः रोशन मैयाँ सुवाल जु पिंसं बजार अनुगमन यो वाडा बलय् व्यवसायीपिसं तस्कं लापवाही यागु खानय् दःगु लिं नगरपालिकां अजपुं व्यवसायीपिन्ता सचेत याय्गु ज्या याड च्वंगु, खप नगरपालिकां स्थानीय सामग्रीत अपलं प्राथमिकता बियो वयो च्वंगु व खप दे सभ्य व सुसंस्कृत दय्केता नगरबासी दाजुकिजा तता-केहें पिनिगु तहांगु लाहा दः धायोदिल ।

भेलाय् भूःपुं पसल्यातय्सं थः थः गु व्यवसायिक समस्या काड नगरपालिकां सुचुकुचु व व्यवसायीपिन्ता बियमःगु सुविधया बारे राय-सुभावात प्वकगु खः । वहे भेलाय् खप नगरपालिका वडा नं. १० या वडा निरीक्षक रामकृष्ण प्रजापति जुं नं न्वचु तयो द्यगु खः ।



डयगुगु स्वप पौ, बःछि पौ(पाक्षिक)

निकोल्सन मा.वि.या ब्वनामिपुं नगर प्रमुख प्रजापति जु नपां

चैत्र १९

ख्वप नगरपालिकाया प्रमुख सुनिल प्रजापति जु नपां ख्वप नगरपालिका वडा नं. १ सल्लाघारी चाय्कः तःगु निकोल्सन मा.वि. या हिं छगू तगिंया ब्वनामिपुं ख्वप नगरपालिकाय् वयो प्रमुख जू नपालात । उगु नपालाय्गु इवल्य् ब्वनामिपिन्ता प्रमुख प्रजापति जुं



स्थानीय सरकारया संरचना, विकास निर्माणया ज्याइवःत नपां थी थी विषयल्य् खाँ ब्याकः दिसे ख्वप नगरपालिकां ख्वपया ब्वनामि पिनिगु स्तर च्वछाय्या निंतिं याडः च्वंगु ज्या इवतःनं काडः दिल । उगु ज्या इवःसं अन्तरक्रिया यासे नगरप्रमुख प्रजापति जुं स्थानीय तहया ज्या, याय्मःगु कर्तव्यया खाँ ब्वनामिपिन्ता

ध्वाथुइकसे ख्वप नगरपालिकां कानुनया दुनय च्वडः थःगु ज्या इवःत दयकः हज्याड च्वंगु खाँ नं काडः दिल ।

ख्वप नगरपालिकां जलाखाला नगरपालिकानपां नं मः काथं सल्लाह व ग्वाहाली कायो-बियो मेमेगु स्थानीय तह नपां नं थःथःगु अनुभवकाडः न्यड वयो च्वडागु खाँ काडः दिल । वयकलं 'छखा छँ छम्हा स्नातक पास जू म्हा मनुदयकेगु अभियानं ख्वपय् शैक्षिक लागाय् ह्युपा वगु खाँ काडः दिल । वयकलं ख्वप नगरपालिकाता छगू नमूना काथं ब्वसेलागु नगरपालिका दयकेगु मतिं नगरपालिकां ज्या साडः च्वंगु खाँ नं ब्याकः दिल ।

वयकलं योग्य व सक्षमपुं मनूतय् गुळ्ने प्वा द्यांलाई मखु धायो दिसे ब्वनामिपिन्के नैतिक शिक्षा म्हवँ जुयो वांगु खाँ नं काडः दिल । नपां शिक्षा व स्वास्थ्यया समस्या ज्यंकय् फःसा जनताया बछ्छी समस्या ज्यनिगु खाँ काडः दिसे दे ह्छ्याय्ता फुक्क काथंया जनशक्ति उलि हे मदय्क मगाइगु खाँ नं काडः दिल ।

ज्या इवःखय् व पुं ब्वनामिपिसं ख्वप नगरपालिकां याडः च्वंगु शिक्षा, स्वास्थ्य सुचुकुचु, विकास निर्माण, कासा, कृषि थजगु लागाय् याड वयो च्वंगु ज्याया विषय थः थः गु मनया खाँ नगर प्रमुख जु याता न्हयसः थान । ज्याइवःख्वप नगरपालिकाया प्रशासकीय अधिकृत दामोदर सुवाल जुं न्ह्याकः दय्गु खः ।

सम्पदा ल्हवनय् कानय्खय् मौलिक पहः तांकय् मज्यगु

चैत्र २०

सहरी आवास पुनः निर्माणया रणनीतिक मुद्दात व लिपाया (भावी कार्य दिशा) ज्या सानय्गु लौपु विषयसं जगू छन्ह्या कार्यशाला गोष्ठी ज्या इवःसं मू पाहाँ ख्वप नगरपालिकाया प्रमुख सुनिल प्रजापति जुं ख्वप नगरपालिका दुनयँ २०७२ सालया तःभ्वखाचां स्यंकः ब्यूगु निजी आवासपाखय्या भूकम्प पीडित लाभग्राहीखय् न्हापांगु किस्ता कःपुं ५,६८० छँ यायपुं, नेकगू किस्ता कःपुं २,२६१ व स्वकगू किस्ता कःपुं २०३४ खा छँ यायपुं जक दःगु ल्याखं (तथ्याङ्क) कयंगु खाँ पिब्वसे तः भ्वखाचां १२० गू स्वयो अपः सम्पदात स्यंकः थुडः ब्यूगुलि ख्वप नगरपालिकां १०८ गू दय्के धुंगु, ल्यंदःगु नं दय्क च्वंगु खाँ ब्याकः दिल ।

वयकलं ठेक्का बिइबल्य् ठेकेदारं सम्पदाया महत्व स्वयो लबः जक स्वइगुलिं सम्पदा ल्हवनय्-कानय् व दानय्गुलि ठेक्का बियगु मखुथाय् लाइगुलिं अथे याय मज्यगु खाँ ब्याकः दिल ।

ख्वपया नेगू प्यंगु सम्पदात ल्हवनय्-कानय् व दानय्ता प्राधिकरणं छखय् लिइकगु धःगु धेबा अः तक नं छ्वयो महःगू खाँ न्हिँ थांसे प्रमुख प्रजापतिजुं हिगू करोड तक दां तकया उपभोक्ता वा लाभग्राही पाखं ल्हवनय् कानय् व दानय्गु ज्या याय् दय्मः दक

तःक हे सिफारिस याडां नं स्वीकृति मज्यगुया कारण न्यडः दिसे स्पष्ट याडः बिया दक प्राधिकरणया प्रमुख कार्यकारी अधिकृत सुशील ज्वालीजुयाता न्हयसः याड द्यगु खः ।

ख्वप नगर दुनय् अजनं सच्छीखय् खुइब्व स्वयो अपः छँ तः भ्वखाचां थुडः ब्यूगु दानय् मफयो च्वंगु खाँ न्हिँथांसे वयकलं तः भ्वखाचां पीडित पुं लाभग्राही पिन्ता फुक्क अनुदानया धेबा छकलं बियमःगु उगु धेबां छँ दानयँ मफैगुलिं अनुदानया धेबा तानयँ मःगु, बहुस्वामित्व (तःम्हासिया नामय् लाडः च्वंगु) नपां पुर्जा मरपिनिगु समस्या ज्यंकय्ता हचिल्य् मः धायोदिल ।

वयकलं सम्पदा ल्हवनय्-कानय् व दानय्ता राज्यं मःगु सिंया व्यवस्था याय्मःगुलि बः ब्यूसे सम्पदा ल्हवनय्-कानय् व दानय्बल्य् भ्नीगु थःगु मौलिक प्रविधि व शैली (स्थानीय) भ्नीथाय् हे दःगु सामग्रीत छ्यल्य् मः धायो दिल ।

गोष्ठीसं विज्ञपुं नेम्हा सूर्य भक्त सांगाछँ व सूर्य नारायण श्रेष्ठ जूपिसं (Taking forward the urban housing strategic issues) विषयसं प्रस्तुतिकरणया कार्यकारी अधिकृत सुशील ज्वाली जुया प्रमुख आतिथ्यताय् जगू खः ।

अवकाश काय धुपुं शिक्षक व न्हूपुं प्र.अ पिन्ता हानेज्या

चैत्र २०

ख्वप नगरपालिकाया प्रमुख सुनिल प्रजापतिया मू पाहाँलय आधारभूत विद्यालय समिति ख्वपया ग्वसालय जूगु अवकाशकाय धुपुं शिक्षकपुं व न्हूपुं प्र.अ. पिन्ता सुभाय देछाय्गु ज्या नपां हानेज्या व सिरपा लः ल्हाय्गु ज्या शुक्रबार क्वचाल ।

ज्या इवःसं अवकाश कायो द्यूपुं शिक्षक व प्र.अ. पिन्ता सुभाय देछायो दिसे नगर प्रमुख प्रजापति जुं पुलांगु पुस्ताया शैक्षिक अनुभव व न्हूंगु पुस्ताया जोश जाँगरं ब्वनय्कुथित ब्यवस्थित काथं हछ्याय्ता ग्वाहाली जुइगु खाँ काड दिल । अवकाश काय धुपुं प्र.अ. व शिक्षकपिसं थः थः गु शैक्षिक अनुभव मुंकः पिथाडः न्हूंगु पुस्ताया दथ्वी ह्यमःगुलि बः बियो दिसे प्रमुख प्रजापतिजुं बांलाम्हासिया न्ह्यलुवाय् हछ्याय् फःसा अलय अनुशासनय् च्वड हज्याकय् फःसा संस्था बांलाड वानिगु खाँ काड दिल । वयकलं ख्वपया सामुदायिक व संस्थागत विद्यालयया दथ्वी गुणस्तर उथिं ग्यंकः यंकय्गु उद्देश्यं हज्याडः च्वंगु उकिया लागिं भौतिक संरचना दानय्गु व मः थाय् ल्हवनय्गुया लागिं नगरपालिकां आर्थिक ग्वाहाली याडः च्वंगु खाँ काड दिल ।

ख्वपया शैक्षिक लागाय् ह्युपा ह्युता शिक्षकपुं व प्र.अ. पिनिगु त्हांगु लाहा दःगु खाँ न्हिथांसे शिक्षकपुं प्रविधि मैत्री जुयमःगु व न्हूँ न्हूंगु प्रविधि व खाँत सिद्धकय्ता न्ह्याब्लें हचिल वय्मः धायोदिल ।

ज्याइवःया सभाया नायो नपां समितिया नायो दिपक माकं

आधारभूत विद्यालय समितिया 'वार्षिक प्रगति प्रतिवेदन' ब्वडः न्यंकः दिसे समाज शिक्षितमजू तलय् छुं नं थाय्या बांलागु प्रगति जुइमखु धायोदिल । सरकारं शिक्षाख्य् अपलं लगानी याय् मःगु खाँ ब्याकसे वयकलं समिति, शिक्षक व ब्वनामिपिनिगु विकास व प्रगतिया नितिं थी थी ज्या इवः न्ह्याकः वयो च्वंगु खाँ ब्याक दिल ।

ज्या इवःसं आधारभूत विद्यालय समितिया संस्थापक दुजः लक्ष्मीनारायण दुवालजुं अवकाश धाय्गु कानुनी व प्राकृतिक नियम खः धायो दिसे अवकाश काय धुपुं शिक्षक व कर्मचारी पिसं समाजया थी थी लागाय् हछ्याय्या नितिं सक्रिय जुयो हःनय् वयमः धायोदिल ।

वहे ज्या इवः ख्य् समितिया निवर्तमान नायो तुल्सिराम ग्वाछा व संस्थापक दुजः पुष्पलाल सुजखु जु पिसं नं थः थः गु शैक्षिक अनुभव काड द्युगु खः ।

ज्या इवःसं समितिया न्वकु मयजु सर्मिला कसजुं लसकुस न्वचु तयो द्युगु खःसा ज्या इवः सुर्यबहादुर फाँजु न्ह्याक द्युगु खः ।

ज्या इवःसं नगर प्रमुख प्रजापति जुं थी थी ब्वनय् कुथि अवकाश कायो द्यूपुं शिक्षक पिन्ता हानेज्या यासे आधारभूत विद्यालय समितिया ग्वसाल जूगु थी थी कासाया धिं धिं बल्लाख्य् तः लापुं कासामि ब्वनामिपिं दसि पौ स्वापु दःगु ब्वनय्कुथिया शिक्षकपिन्ता लः ल्हाड दिलसा न्हूँम्हा ल्यज्या याडः हःम्हा नायो माक जुं न्हूँपुं प्र.अ. व शिक्षक पिन्ता सुभाय देछायो दिल ।





डयुगुगु स्वप पौ, बःछि पौ(पाक्षिक)

तालिम प्रशिक्षार्थी पिन्ता दसिपौ लः ल्हात

चैत्र २०

ख्वप नगरपालिकाया गवसालय जूगु प्यलाया बूटिक, स्वलाया उन्नत व प्यलाया आधारभूत सिलाई तालिमया प्रशिक्षार्थीपिन्ता दसिपौ लः ल्हाय्गु ज्या इवःसं ख्वप नगरपालिकाया प्रमुख सुनिल प्रजापति जुं थः गु लाहातय् ज्या दःपुं ल्यासे ल्याम्होपुं गुब्ले हे द्यांलाई मखु धायोदिसे बैदेशिक रोजगारय् वापुं ल्यासे ल्याम्होपुं म्हवचा ज्यालां जिवय्ता खतरा जुइगु ज्या याय् माल च्वंगु खाँ ब्याकदिल । लाहातय् ज्या दैगु अनेक सीप सय्क तःसा यक्व फाइदा जुइगु खाँ ब्याकसे प्रमुख प्रजापति जुं थौं कन्हेया आधुनिक प्रविधि भीगु थः गु हे मौलिक सीपत ताड वानिगु भय दैःगु नपां ल्यासे ल्याम्होपुं ई नपां प्रविधि मैत्री जुयमः धायो दिल ।

व्यकलं शिक्षामत धःसा समाजय् हौं कायो च्वंगु अन्धविश्वासं याड बांमलागु घटनात जुयो च्वंगु खाँ ब्याकसे व्यकलं अन्धविश्वासता हाँगलिसे लिडः छ्वय्गु खःसा जनताता शैक्षिक रुपं चेतना ग्वाक : यंकय् मः धायोदिल ।

ख्वप नगरपालिकां नगरबासीपिनिगु लागिं थी थी लाहातय् ज्या दैगु सीप त स्यं स्यं वयो च्वंगु गुकिं थःगु तुतिखय् थः हे दानय् फैगुलि नगरपालिकां उद्देश्य तयो हे सीपमूलक तालिम बियो च्वंगु खाँ नपां व्यकलं ख्वः स्वयो मखु मन्या लाहातय्या ज्या व वयागु गुणं मन्या महन्व अप्वइगु खाँ काड दिल ।

ख्वप नगरपालिकाया उप-प्रमुख रजनी जोशी जुं ख्वप दे

शैक्षिक रुपं हज्याड च्वंगुया कारणं हे थानाया नागरिकपुं शिक्षित व जागरुक जूगु खाँ ब्याकसे मिसामस्तय्ता आरक्षण स्वयो लाहातय् ज्या दैगु सीप स्यडः वियमःगु, मिसामस्तय्के सीप नपां छुं भाति धेबा दःसेलिं थमनं हे खर्चयाय् दःगु व समाज मिसा-मिज्या दश्वी मपाकः स्वयो हःगु खाँ ब्याक दिल ।

ज्या इवःसं ख्वप नगरपालिका वडा नं. ८ या वडाध्यक्ष रविन्द्र ज्याख्व जुं सुभाय् देछायो दिसे थःगु सीप व थमनं कायागु दसिपौ खः थाय् छय्लय् सय्केमः धायोदिल ।

दसिपौ लः ल्हाय्गु ज्या इवः सं कार्यपालिकाया दुजः पुं नेम्हा रोशन मैयाँ सुवाल व कृष्ण लक्ष्मी दुवालं ख्वप नगरपालिकां न्ह्याकः च्वंगु थी थी तालिमया खाँत काड दिसे जीवनोपयोगी लाहातय् ज्या दैगु तालिमं नागरिक पिन्ता थःगु तुतिखय् दानय् फैगु खाँ ब्याक दिल ।

नगर प्रमुख प्रजापति जुं प्यलाया बूटिक तालिमया १५ म्हा, स्वलाया उन्नत सुज्या सुयगु तालिमया १३ म्हा, प्यलाया आधाभूत सुज्या सुयगु तालिमया १६ म्हा याड मुक्क ४४ म्हा प्रशिक्षार्थीपिन्ता दसिपौ लः ल्हाड दिल ।

ज्या इवःसं ख्वप नगरपालिका कार्यपालिकाया दुजः सरिना द्योला व सुज्या सुयगु ज्या स्यनिम्हा प्रशिक्षक धर्मलक्ष्मी लघु नं थः गु नुगः खाँ प्वंक द्यूगु खः ।





डयगुगु स्वप पौ. बःछि पौ(पाक्षिक)

मचाछँ व दुरुपोया क्यान्सर परीक्षण

चैत्र २१

ख्वप नगरपालिकाया गवसालय् ख्वप नगरपालिका वडा नं. २ सं छन्हूया निःशुल्क मचाछँ व दुरुप्वया क्यान्सर परीक्षण शिविर शनिबार सुथाय् जेसिस इङ्गलिश स्कूलया हःनय् जूगु खः । अः अपलं डाडः वयो च्वंगु दुरुप्व व मचाछँया क्यान्सरं अपलं मिसात पीडित जुयो च्वंगु इलय् नगरबासी मिसामस्तय्गु लागिं ख्वप नगरपालिकां उगु शिविर तःगु खः ।



शिविरया उलेज्या याडः दिसे ख्वप नगरपालिकाया प्रमुख सुनिल प्रजापति जुं उखुम (क्यान्सर) ल्वयया उपचारखर्च अपलं थिकय् जूगुलिं इलय् हे थुगु ल्वय् सिङ्कः वास याय्ता सतर्क जुयो च्वनय्ता फुक्क वडाय् ख्वप नगरपालिकां निःशुल्क परीक्षण शिविर न्ह्याकः वयो च्वंगु खः धायो दिल ।

ल्वचं मनूता शारीरिक व मानसिक रुपं बाँमलाक लिचवः लाकिगुलिं इलय् हे थःकय् ल्वय दःला/मरुला दक परीक्षण याक च्वनय्मः धायोदिसे वयकलं मनू तःमि जुयगु

स्वयो स्वस्थ जुयमः धायो दिल ।

ख्वप नगरपालिकां जनस्वास्थ्य सेवा केन्द्र पाखं मदिकक जनताता सेवा ब्यू ब्यू वयो च्वंगु खाँ ब्याकसे वयकलं ख्वप नगरपालिका पाखं दय्क च्वंगु ख्वप अस्पतालं स्तरीय व सुविधासम्पन्न स्वास्थ्य सेवा त वियगुमतिं नगरपालिकां ज्या साडः च्वंगु खाँ ब्याकदिल ।

ख्वप नगरपालिका वडा नं. २ या वडाध्यक्ष हरि प्रसाद बासुकला जुं वडाबासीया स्वास्थ्य अवस्था सिङ्कय्ता व निःशुल्क स्वास्थ्य जाँच याय्ता लागिं शिविर तयागु खाँ काडः दिसे ख्वप नगरपालिकां गरिब जनताता बिचः याडः निःशुल्क स्वास्थ्य शिविर, शैक्षिक ऋण व छात्रवृत्ति, कृषि प्राविधिक तालिम छँ छँ वाडः नर्सिङ सेवा थजगु ज्याखय् बः बियो वयो च्वंगु खाँ ब्याक दिल ।

ज्या इवःसं वडाया दुजः तुल्सि लक्ष्मी दुमरं स्वस्थ्य जुयो च्वनय्गु धाय्गु हे तः मि जुयो च्वनय्गु खः धायोदिसे न्हिया न्हिथं ब्यायाम व इलय् ब्यलय् स्वास्थ्य जाँच याकय् फःसा मिसामस्त ल्वचं मकय्क जुय फै धायोदिल ।

वडा नं. २ या स्थानीय राजन जतिं कोभिड भ्वल्वय काथं डाडः पुडः वाडः च्वंगु इलय् बांलाक वास याय् मफःपुं अः स्वास्थ्य समस्या जुङ्कः च्वंगु खाँ ब्याकसे वडाया जुङ्गु हरेक ज्याइवः खय् वडाबासीपिनिगु सक्रियता सकारात्मक खः धायोदिल ।

शिविरसं भक्तपुर क्यान्सर अस्पतालया डाक्टर रोशनी छुकां नं मिसातय्गु पाठेघरया (म्हूतु) च्वकाय् च्वंगु उखुम (क्यान्सर) जाँचय् याकः क्यान्सर जु मजू सिङ्कः व थः सुचुकुचुखय् अपलं ध्यान तयो जुयफःसा नं अपलं ल्वचं मकइगु खाँ काडः दिल । ज्या इवः वडाया दुजः श्याम सुन्दर मातां नं याडः दय्गु खः ।

६ वडाय् निःशुल्क मिखाया शिविर

चैत्र २१

ख्वप नगरपालिकाया गवसालय् उपप्रमुख रजनी जोशीया मू पाहाँलय् ख्वप नगरपालिका वडा नं. ६ खय् छन्हूया निःशुल्क मिखाया शिविर ६ नं वडा समितिया हःनय् जूल ।





ड्यगुगु स्वप पौ, बःछि पौ(पाक्षिक)

न्हँपुं विद्यार्थीपिन्ता लसकुस नपां अभिमुखीकरण

चैत्र २२

ख्वप नगरपालिका पाखं न्ह्याक च्वंगु ख्वप कलेजय् शैक्षिक वर्ष २०७७/७८ या बी बी एम ज्या इवः खय् भर्ना जू पं न्हँपुं ब्वनामिपिन्ता लसकुस नपां अभिमुखीकरण ज्या इवः आइतबार कलेजया सभाहलय् जुल ।

ज्या इवःसं कलेज सञ्चालक समितिया नायो नपां ख्वप नगरपालिकाया प्रमुख सुनिल प्रजापतिजुं न्हँपुं ब्वनामिपिन्ता ख्वप कलेजय् लसकुस यासे लिपा भविष्यया लागिं सभ्य व सु-संस्कृत नागरिक ब्वलांकय्ता ख्वप नगरपालिकां ब्वनय् कुथित चाय्कगु खाँ ब्याक दिल ।



शिक्षा व देशया राजनीतिया क्वातुगु स्वापु दैगुलिं समाजय् ह्युपा ह्युता राजनीतिक चेतनां तः हा.गु ग्वाहाली याइगु खाँ

वयकलं काड दिसे ब्वनामिपुं राजनीतिक रुपं सचेत व संगठित जूसा न्ह्याथिन्योगू अनियमितताया विरुद्धय ल्वाय्गु बः अमिकय् दैगु खाँ नं ब्याक दिल ।

वयकलं इमान्दार राजनीतिक नेतृत्व व सिद्धान्तखय् प्रतिवद्ध राजनीतिक पार्टी जक देशता हचिइक यंकय् फैगु खाँ ब्याकसे न्हँपुं ब्वनामिपिसं थमनं ब्वडागु विषयलय् दक्षता व विशेषता काय्मः धायोदिसे ब्वनामिपुं म्वः मरुगु ज्याखं तापाक्क च्वडः ख्वपकलेजय् ब्वनय् दःगु याता गौरब ताय्केमः धायोदिल ।

ख्वप कलेजया प्राचार्य रुपक जोशी जुं न्हँपुं ब्वनामिपिसं ख्वप कलेजया गरिमा च्वनिगु काथं अनुशासित जुयो बांलाक ब्वनय्मः धायोदिसे कलेज चाय्कगुया मू उद्देश्य ख्वपता ज्ञान विज्ञानया केन्द्र दय्केगु नपां सभ्य व सुसंस्कृत नागरिकता ब्वलांकय्गु खः धायो दिल ।

ख्वप मा.वि. या प्राचार्य प्रकाश कुमार श्रेष्ठ जुं ब्वकिपुं शिक्षक व ब्वनामिपिनिगु स्वापु बांलासा जक ब्वंकय्गु प्रभावकारी जुयफै धायोदिसे वयकलं ब्वनामिपिन्ता सफलता काय्केगुलि शिक्षक पिनिगु तहांगु लाहा दैगु व शिक्षक व ब्वनामिया सकारात्मक स्वापु खं ब्वनामिपिन्ता मन च्वछाय्के फैगु खाँ काड दिल ।

ज्या इवःसं ख्वप कलेजया उप-प्राचार्य डा. राजेश कुमार श्रेष्ठ जुं सुभाय् देछायो द्युगु खःसा बी बी एम ज्याइवःया इन्चार्ज सुनिल सुवाल व शिक्षक कमिनिका न्याइ च्याई नं थःगु खाँ तयो द्युगु खः । नपां बी बी एम संकायया न्हापांगु दँ या अल्का

मानन्धर व नेगुगु दे या सुवेच्छा श्रेष्ठ ख्वप कलेजय् ब्वडा बलय्या थःगु अनुभव कांगु खः ।

इगाप

ख्वप नगरपालिका पाखं पिथाड च्वंगु स्वप पौ बः छि पौ खय् बांलागु च्वसु त बियो ग्वाहाली याड दिसँ । उगु रचनाया ल्यः ज्या याड पारिश्रमिक बियगु खाँ ख्वप नगरपालिकाया २०७७ श्रावण २६ गते च्वंगु बैठकं

क्वः छ्युगु खाँ ब्याक च्वडा ।

सम्पादक
ख्वप पौ

त्वालय्-त्वालय् जुइगु स्थानीय जात्रा याय् दैगु

चैत्र २३

ख्वप नगरपालिकाया प्रमुख सुनिल प्रजापतिया नायोसुई ख्वपया लोकं ह्वागु बिस्का जात्रा डाय्केगु विषय स्वापु दःपुं मनूत नपां बैठक चवन ।

बैठकसं नगर प्रमुख प्रजापतिजुं जात्राया इलय् हुलमुल मयाय्ता नपां मः काथंया स्वास्थ्य मापदण्डय् च्वडः नगरपालिकां जनचेतनामूलक ज्या इवः याय्गु, बिस्काया इलय् त्वालय् त्वालय् डाय्किगु थी थी जात्राखय् भीडभाड म्हवँ याड ग्वाहालिमिपुं (स्वयम सेवक) छ्यलय्गु व जनताया छँ छँ साभं, माक्स इड बियगु ज्यात तयारी याडः च्वंगु खौं काड दिल ।

जिल्ला प्रशासन कार्यालय ख्वपया सहायक प्र.जि.अ. मुकेश कुमार केशरी जुं मानव जीवन रक्षा हे न्हापांगु व तहांगु ज्या जूगुलिं थुगुसीया बिस्का जात्रा मः काथंया पूजा आज्ञा जक याड डाय्केगु निर्णय जुय धुंगुलिं कोभिड संक्रमणया ग्यापुगु भय खं याड हुलमुल जुइगु ज्या मयाय्ता इनाप याड दिल ।



बैठकसं महानगरीय प्रहरी परिसर ख्वपया प्रहरी उपरीक्षक तारादेवी थापां सलंसः दाँ न्हपानिसं डाय्क वयो च्वंगु जात्रा व परम्पराया विशेष महत्व दैगु खौं ब्याकसे संतुलित ढंगं हेः डाय्क वयो च्वंगु बिस्का जात्रा डाय्केता सकलसिया मंकः कुतः मः धायोदिल ।

अथेहे गुथि संस्थान ख्वपया कार्यालय प्रमुख आनन्दप्रसाद कर्माचार्य जुं संस्थानं बिस्का जात्रा नपां स्वापु दःगु फुक्क दायित्व पू वांकय् धुंगु खौं ब्याकसे जात्राया इलय् थः यत्थं लापवाही मयाय्ता अनुरोध याड दिल ।

जनस्वास्थ्य सेवा केन्द्र ख्वपया प्रमुख रत्न सुन्दर लासिवाजुं जलाखाला देशं नेपः देशय् द्रहँ वैपुं मनूतय्के कोभिड भवलय् खानय् दयो च्वंगु इलय् हुलमुल जुइगु जात्रा-पर्वया इलय् फुक्क सुरक्षित जुयता इनाप याड दिल ।

बैठकसं ख्वप नगरपालिकाया जनप्रतिनिधिपुं, सुर्यविनायक

ब्यारेकया प्रमुख सेनानी सामन्त ध्वजखौं, सशस्त्र प्रहरी उपरीक्षक लीला बहादुर कार्की, राष्ट्रिय अनुसन्धान विभागया उपनिर्देशक विकास पाण्डे, तलेजु भवानीया पुजारी प्रजेश राजोपाध्याय, नेपाल विद्युत प्राधिकरण, ख्वप मिनिबस सेवा प्रा.लि., भक्तपुर उद्योग वाणिज्य संघ, घरेलु तथा साना उद्योग कार्यालयया प्रतिनिधिपुं बैठकय् भःगु खः ।

नपां बिस्का जात्रा नपां स्वापु दःगु इन्द्रायणी, बाराही, ज्याथा गणेश, भैरवनाथ, ब्रम्हायणी, माहेश्वरी, कुटी प्वाकः गणेशया जात्राया स्वापु दःपुं नपां थुगुसीया बिस्का जात्रा व बिस्का नपां स्वापु दःगु स्थानीय जात्रात शान्तिपूर्ण, व्यवस्थित व सुरक्षित काथं डाय्केगु विषयसं थः थः गु नुगु खौं प्वक दिल ।

बिस्का जात्रा न्ह्याकय्गु विषयसं ख्वप नगरपालिका प्रकोप व्यवस्थापन समितिया न्हि ल्या २०७८ चैत्र १७ व १८ गतेया बैठकं जात्रा नपां स्वापु दःपुं थी थी पक्षकय् राय-सल्लाह सुभावा कायो निर्णय या काथं २०७७ चैत्र २३ गते स्वापु दःपुं फुक्क पक्षयाय्पुं बैठक च्वड क्वय च्वया काथंया निर्णय यात ।

१. बैठकं जिल्ला स्तरीय कोभिड १९ संकट व्यवस्थापन सञ्चालन केन्द्र ख्वपया मिति २०७७/१२/२२ गते च्वंगु बैठकं थुगुसीया बिस्का जात्राखय् पुजारी जक तयो मः काथं पूजाजक याय्गु नपां भैलखः लुयगु, ल्योसिं थानय्गु जात्रा वांगु दायँ थें थुगुसी नं याय्गु धाय्गु निर्णय जुय धुंगुलिं ऐतिहासिक नपां सांस्कृतिक महत्व कः घाडः च्वंगु ख्वपया लोकं ह्वागु बिस्का जात्रा नपां स्वापु दःगु त्वालय् त्वालय् जुइगु जात्रात स्वास्थ्य सुरक्षा मापदण्ड पालना याडः सामान्यकाथं जात्रा याय्ता स्वापु दःपुं सकलसिता इनाप याय्गु ।

२. कोभिड १९ मपुंकः मडांकः पाडः तय्ता ख्वप दुनय्या नगरबासीपिनिगु स्वास्थ्यता बिचः याडः ख्वप नगरपालिकां नगरबासीपिन्ता स्वास्थ्य सुरक्षाया सामग्रीत छँ छँ वाड इड बियगुः, जनचेतना मूलक ज्यात न्ह्याकय्गु, माइकिड पर्चा इनय्गु नपां सूचं पिथानय्गु निर्णय यात ।

३. बैठकं थुगुसीया बिस्का जात्राया ई दुनयँ ख्वप नगर दुनय् छुं काथंया हुलमुल मयाकसिं शान्तिपूर्ण ढङ्गं सामान्य काथं जक जात्रा क्वचाय्केगु सुरक्षा व मः काथंया बन्देबस्त जिल्ला प्रशासन कार्यालय ख्वप लगायत जिल्लाया फुक्क सुरक्षा निकायं याय्गु निर्णय यात ।

४. बिस्का जात्रा नपां स्वापु दःगु जात्रा व्यवस्थापनया लागिं गुठी संस्थान, ख्वपं मः काथं ग्वाहाली याय्गु निर्णय नं उगु बैठक यात ।

मास्क व साभुं इत

चैत्र २३

प्रतिनिधिसभाया दुजः सांसद प्रेम सुवालजुया स्थानीय पूर्वाधार विकास कोषपाखं ख्वप नगर दुनयें मास्क व साभुं इड वियगु ज्या इवः ख्य् ख्वप नगरपालिका वडा नं. १ मड्गलबार इड बियगु ज्या जुल ।



ज्या इवःसं ख्वप नगरपालिकाया प्रमुख सुनिल प्रजापतिजुं बिस्का बलय् त्वाल्य् -त्वाल्य् जुडगु स्थानीय जात्रात मः काथं जक डाय्के मःगु खाँ ब्याकदिल । वयकलं महामारीया न्हँगु लहरया इलय जनताया स्वास्थ्य प्रति जिम्मेवार जुयमः धायो दिल ।

वयकलं ख्वप नगरपालिकां स्थापना यागु अस्पताल दान्य् धुंके ख्वपया नगरबासीपिसं अझ बांलाक स्वास्थ्य सेवा काय् फै धायो दिल ।

ख्वप नगरपालिका वडा नं. १ या वडाध्यक्ष श्यामकृष्ण खत्री जुं महामारीया इलय् जनस्वास्थ्य व जनचेतनाया बिचः याडः साभुं व मास्क इड ब्यगु खाँ ब्याक दिल ।

ज्या इवःसं स्थानीय समाजसेवी लक्ष्मी नारायण राजलवट, महिला वडाया दुजः गंगालक्ष्मी बमनु, वडाया दुजः सुर्यप्रसाद श्रेष्ठ पिसं नं न्वचु तयो द्यगु खः ।

बिस्का जात्रा सभ्य व शान्तिपूर्वक डाय्कय्

चैत्र २५

नेपाल मजदुर किसान पार्टीया छ्याञ्जे नपां सांसद प्रेम सुवालया मू पाहाँलय् ख्वप नगरपालिकाया प्रमुख सुनिल प्रजापतिया नायो सुई ख्वप नगरपालिका नगरस्तरीय नगर प्रकोप व्यवस्थापन समिति (सी एम सी) व ख्वपया लोकं ह्वागु बिस्का जात्रा नपां स्वापु दःपुं मनूत च्वड बैठक जुल ।

बैठकसं सांसद सुवाल जुं हःनय् वयो च्वंगु ख्वपया लोकं ह्वागु बिस्का जात्रा डाय्केगुलि जनताया मनोभावना थुडुकः डाय्केमःगु खायें बः ब्यसे जलाखाला दे भारतय् कोभिड १९ भ्वल्वय्या न्हँगु प्रजातिं तस्कं महामारी रुप कायो च्वंगु व गुलिं थासय् कफ्यु नपां याड च्वंगु इलय् नेपः व भारतया खुल्ला सीमानां याड नेपालय् नं संक्रमण दर अप्वय फःगुलिं फुक्क सचेत जुयमः धायोदिल ।

ख्वप नगरपालिकाया प्रमुख सुनिल प्रजापति जुं छुं दिन न्हयों निसें हे ख्वप नगरपालिकां बिस्का जात्रा नपां सम्बन्धित दाफा, भजन, गुठी नपां सरोकार दःपुं नपां न्हिया न्हियं छलफल याड निर्णय यायां वयागु खाँ ब्याकसें थुगुसी नं जनताया भावना कः घाड हज्याय्गु खाँ काड दिल ।

बैठकय् ख्वप जिल्लाया प्रजिअ प्रेम प्रसाद भट्टराई जुं जनताया स्वास्थ्य सुरक्षाता बिचः याड थुगुसीया भैलख लुयगु जात्रा व ल्योसीं थानय्गु व क्वथय्गु जात्राता प्रशासनं छुं भाति कडा याडागु स्वीकार यासे जनभावना काथं नगरपालिकां याडगु निर्णयखय् थः सकारात्मक जुयागु खाँ काड दिल ।

बैठकय् गुठी संस्थान ख्वपया कार्यालय प्रमुख आनन्द प्रसाद कर्माचार्य व जात्रा नपां स्वापु दःपुं मनू तय्गु बैठकं बिस्का जात्रा डाय्केता महत्वपूर्ण निर्णय यागु जुलः ।

बैठकं हःनय् वयो च्वंगु ख्वपया लोकं ह्वागु बिस्का जात्राया भैलखः लुयगु, ल्योसिं थानय्गु व क्वथय्गु जात्रा कोभिड १९ भ्वल्वयया संक्रमणया जोखिमता बिचः याड मः काथं स्वास्थ्य मापदण्ड दय्कः सभ्य व शान्तिपूर्वक डाय्केगु,



जात्राया प्रत्यक्ष टेलिभिजन, रेडियो, एफ.एम व सामाजिक सञ्जाल पाखं क्यनय्गु नपां अनुशासित व मर्यादित रुपं स्वास्थ्य मापदण्ड पालना याड सभ्य काथं जात्रा याय्ता माइकिड याड फुक्क सिता सचेत जुयता अनुरोध यायगु,

नपां बिस्का जात्रा न्ह्याकय्ता मः काथं तयारी याय्ता स्वापु दःपुं फुक्क पक्षनपां इनाप याय्गु, जात्रा ज्वः छि शान्ति सुरक्षाया फुक्क बन्दोबस्त जिल्लाया सुरक्षा निकाय पाखं याय्गु निर्णय जुल ।

ख्वप नगरपालिकां थुगुसी ११९ म्हासिता शैक्षिक ऋण बिल

ख्वप नगरपालिकां नगरपालिका लागा दुनय् स्थायी बसोबास याड च्वंपुं ११९ म्हा जेहेन्दार व विपन्न ब्वनामिपिन्ता शैक्षिक योग्यताया (ऐकेडेमिक सर्टिफिकेट) दसि पौ धितो तयो थःगु हे देशय् च्वय थ्यंकः आखः ब्वनय्या लागिं दांकः (सहुलियत) ब्याज कायो बुद्धवार शैक्षिक ऋण इयता सम्भौता न्ह्याकल ।

ख्वप नगरपालिकाया प्रमुख सुनिल प्रजापतिया मू पाहाँलय् बुद्धवार ख्वप कलेजया सभाहलय् शैक्षिक ऋणया लागिं आवेदन ब्यूपुं मध्ये अन्तर्वार्ताखं ल्ययो कःपुं ब्वनामिपिन्ता शैक्षिक ऋण इयगु ज्या इवः जुल ।

ज्या इवः सं नगर प्रमुख प्रजापति जुं ऋण खः थाय् खः थें छ्यलय्ता ब्वनामिपुं व अभिभावक ज्यु पिन्ता इनाप याड दिल । ख्वप नगरपालिकां शैक्षिक विकासया लागिं याडच्वंगु ज्यातय्गु खाँ काड दिसे वयकलं ख्वप शैक्षिक केन्द्र काथं हज्याकय्ता सफल जगुया हुनि मध्ये नगरपालिकां न्ह्याकः च्वंगु कलेज व थानाया शैक्षिक संस्था तय्गु तहांगु लाहा दः धायो दिल ।

वयकलं धेबा मदयो सुं नं च्वय थ्यंकः आखः ब्वनय् मखाना धाय् म्वाय्कः शैक्षिक ऋण बियगु अवधारणा हः चिइकागु खाँ ब्याकसे थःगु विषय दक्षता हासिल याडः देश व समाजया सेवाया लागिं ज्या याय्ता मार्ग निर्देश याड दिल ।

जनताया आधारभूत आवश्यकता दुनय् लागु शिक्षा व स्वास्थ्य तस्कं थिकय् जु जुं वाड च्वंगु थौं या इलय् नगरपालिकां गरिब व जेहेन्दार विद्यार्थीया निंतिं छात्रवृत्तिया ब्यवस्था याडागु खाँ काड दिसे प्रमुख प्रजापति जुं ख्वप नगरपालिका ख्वप विश्व विद्यालय न्ह्याकय्गु स्वीकृति पिड च्वंगु खाँ ब्याक दिल ।

ज्या इवः सं ख्वप नगरपालिका वडा नं. ९ या वडाध्यक्ष रबिन्द्र ज्याख्व जुं ख्वप नगरपालिकां शिक्षाता हदाय् तयो शैक्षिक ऋण, छात्रवृत्ति इड बियो वयो च्वंगु खाँ ब्याकसे ख्वप नगरपालिकां न्ह्याक च्वंगु शैक्षिक संस्थाय् ब्वनय्गु मति दःपुं ब्वनामिपिनिगु दथ्वी धिं धिं बल्ला जुइगु खाँ काड दिल ।

ख्वप नगरपालिकाया प्रमुख



प्रशासकीय अधिकृत रामलाल श्रेष्ठ जुं शैक्षिक योग्यताया दसिपौ (सर्टिफिकेट) धितो तयो म्हवें जक ब्याज कायो डागुलाख तका दां तक ऋण ब्यगु ज्या मेगू स्थानीय निकायं नं सय्के वहः जु धायो दिसे ख्वप नगरपालिकाया थुगु पलां देया सेवाख्य् समर्पित जुइपुं सभ्य, सुसंस्कृत व सक्षम नागरिक ब्वलांकय्ता तहांगु ग्वाहाली जुइगु खाँ काड दिल ।

आ.व. २०७७/७८ या लागिं ख्वप नगरपालिका पाखं शैक्षिक ऋण बियगु वचः छ्यपुं ब्वनामिपुं

क्र.सं.	नामथर	क्र.सं.	नामथर	क्र.सं.	नामथर	क्र.सं.	नामथर
१.	मन्दिल मुनकमी	३१.	रिया सिंह राठौर	६१.	मनिषा अवाल	९१.	सिजन प्रजापति
२.	अनिल कोजु	३२.	विप्लव सिंह राठौर	६२.	इशान प्रधानाङ्ग	९२.	ज्योति प्रजापति
३.	विवेक हाकुदुवाल	३३.	संयम प्रजापति	६३.	विनोद थुसा	९३.	कविन प्रजापति
४.	सुनेना कोजु	३४.	जिना प्रजापति	६४.	उषा साद	९४.	सिमल साख
५.	मनोज सुवाल	३५.	सागर सुवाल	६५.	सम्भना ज्याखो	९५.	उज्ज्वल साखकर्मी
६.	श्रीगण कोजु	३६.	सुरेन्द्र प्रजापति	६६.	अनिश मचामसी	९६.	प्रविन प्रजापति
७.	अनमोल कायस्थ	३७.	जेनिस भुजु	६७.	रुस्तम तचामो	९७.	कृशा ज्याख्व
८.	पूजा सुवाल	३८.	सगुन सिखवाल	६८.	नविन कवां	९८.	कृतिका लखे
९.	सविना सुवाल	३९.	पुष्पा कर्माचार्य	६९.	रजिप तुईतुई	९९.	निश्चल कासिछ्वा
१०.	अनु दुवाल	४०.	सूर्यकिरण छुकां	७०.	सोनिता ख्याजु	१००.	सरु फेजु
११.	सुरज खर्बुजा	४१.	मीरा प्रजापति	७१.	सेशन मचामसी	१०१.	रसिक प्रजापति
१२.	एनिस घोपाला	४२.	गौरङ्ग तिमिला	७२.	संगिता चोलेखो	१०२.	प्रमेश कासिछ्वा
१३.	उमेश घोपाला	४३.	रोशन त्वानावासु	७३.	रुपेश कवां	१०३.	मीनु गाईजु
१४.	सुजन खर्बुजा	४४.	निशान चिकंभन्जार	७४.	रेजिना तचामो	१०४.	सुदिप कासिछ्वा
१५.	अनिस पही	४५.	आस्था रजितकार	७५.	सुमिता चोलेखो	१०५.	आरमा गोसाई
१६.	विक्रम बाटी	४६.	रश्मल ध्वजु	७६.	सरिता गोसाई	१०६.	कृति ज्ञामरु
१७.	दीपिका सैजु	४७.	कशिष सुवाल	७७.	सुनिता ग्वाछा	१०७.	रोजन श्रेष्ठ
१८.	सुजन चौगुठी	४८.	राजीव डण्डेख्या	७८.	आदिश प्रजापति	१०८.	रोशिका दुवाल
१९.	नविना भैल	४९.	लक्ष्मी त्वानावासु	७९.	सनिश गोसाई	१०९.	सुशिल लवजु
२०.	सरिता अवाल	५०.	आकाश खाइजु	८०.	बिनिता गोसाई	११०.	रसिला प्रजापति
२१.	रविन ठिमी	५१.	श्रीष्मा लोहला	८१.	रमेश प्रजापति	१११.	सुभाष जामरु
२२.	समन चौगुठी	५२.	विशाल कारंजित	८२.	प्रविना प्रजापति	११२.	सोनिता दुमरु
२३.	सुमन वैद्य	५३.	बिनी खिम्बाजा	८३.	निलम प्याठ	११३.	रोजिना गपी
२४.	युरिका प्रजापति	५४.	जर्बि सुवाल	८४.	सरिता प्रजापति	११४.	रशिला दुवाल
२५.	कृपेश भेले	५५.	मलिका शिल्पकार	८५.	निमा प्रजापति	११५.	रविन वैद्य
२६.	अनु जाकिबन्जार	५६.	सुमिला ग्वाछा	८६.	सृजना प्रजापति	११६.	सांयण्डी छुस्याबाग
२७.	निशा प्रजापति	५७.	सुनयना दुवाल	८७.	प्रशान्त लखेमरु	११७.	प्रवेश मारिखु
२८.	रचना सैजु	५८.	रीना सितिखु	८८.	सुसन ह्यौंगोजु	११८.	यमन मुलगुठी
२९.	रुक्साल दुवाल	५९.	गरिमा फेजु	८९.	रजिना भैनात्व	११९.	रुजन दुवाल
३०.	राज सुवाल	६०.	कविता कोजु	९०.	उज्ज्वल प्रजापति		

भैलखः नेता इलय् लुङ्गु

चैत्र २६

हःनय् वयो च्वंगु ख्वपया तस्कं लोकं हवागु बिस्का जात्रा व्यवस्थित व शान्तिपूर्ण काथं क्वचाय्केता ख्वप नगरपालिकां ग्वसः ग्वगु जात्रा नपां स्वापु दःपुं मनु तय्यु बैठकं क्वय् च्वया काथं या खाँ क्वः छितः

नगर प्रमुख सुनिल प्रजापतिया नायोसुई च्वंगु बैठकं भैलखः न्हिनय्सिया २:०० ता इलय् लुङ्गु, उगु भैलखः तःमाही पूर्व पाखय् अपलं लूसा बुलुबुलुहिति (सुकुल ढोका) पश्चिमय अपलं यंकसा नासमनायतक जक यंकयगु अलय् भैलखतय् जुसी बजु, आँचा बजु, तलेजुया मूल पुजारी, गुठीया नायो, कःमि नायो, चौगुठी नपां क्वछिड तःपुं, मःपुं मनूत बाहेकं मेपुं म्व मरुपुं मनु त मचवनयता इनाप यायगु क्वछित ।



जात्रा ज्वःछि ख्वप नगर दुनय् त्वनय्यु नाःया व्यवस्था काठमाडौं उपत्यका खानेपानी लि. ख्वपता, विद्युत प्रसारण सुचारु यायगु विद्युत प्राधिकरणं, ख्वप वितरण शाखां व टेलिफोन व इन्टरनेट सेवा बांलाक बियता नेपाल टेलिकम ख्वपता जिम्मा बियगु क्वछित ।

जात्रा ज्वःछि ख्वप नगरया थी थी लागाय् आकस्मिक स्वास्थ्य उपचारया लागिं स्वास्थ्य शिविर व्यवस्थापन यायता नगरपालिकापाखं चाय्कः तःगु जनस्वास्थ्य केन्द्र च्याम्हासिंह, थानाया थी थी अस्पतालत व नेपाल रेडक्रस सोसाइति ख्वपता जिम्मा बियगु खाँ क्वजित ।

थुगुसी चैत्र २८ गते द्यो क्वहँ बिज्याइगु जात्रा नपां पसाचहे नं लागुलिं उखुनुं भैलदेगः दुनय् पुजा जक याकय्यु देगः हः नय्या भैल द्यो व बेतः द्यो तयो तः थाय् बली बिइकेगु खाँ नं क्वःछित ।

बैठकं गुठीसंस्थान ख्वपया कार्यालय प्रमुख आनन्द प्रसाद कर्माचार्य जुं पिब्वः काथं २०७७ चैत्र २८ गते निसैं २०७८ बैशाख ५ गते तकया ज्या इवः या धलः पारित यागु दः ।

बैठकय् नगरपालिकाया जनप्रतिनिधिपुं, गुठी संस्थान प्रमुख, सुरक्षा निकायया प्रतिनिधिपुं, विद्युत प्राधिकरण, नेपाल टेलिकम, का.उ.खा.लि ख्वप नपांया कार्यालयया प्रमुखपुं, जात्रानपां

स्वापु दःपुं गुठीया नायो बाज्यापुं, भैल नायो, जुसी वजु नपांया मनूत भायो द्यगु खः ।

धलः पौः -

१. बाजा, सुकुन्दा पुजा ज्वड ख्वपया सल्लाघारी 'खड्ग' गुठी संस्थान भक्तपुर कचाया कार्यालय दुकाय्यु

२०७७/१२/२८

१) सुथाय् ५:०० ताइलय् भैलद्योया महास्नान पुजा व ५:३० ताइलय् बालकृष्ण कर्माचार्यजू पाखं नित्यपुजा क्वचाय्केगु ।

२) सुथाय् ६:०० ताइलय् निसैं ८:०० ताइलय् तक स्थानीय जनताया पुजा क्वचाय्केगु ।

३) सुथाय् च्याताइलय् निसैं गुताइलय् दुनयं नौ बाजा भजनया गुथियार ज्ञानेन्द्र नाथ कायष्ठ नपांया पुचं पुजा क्वचाय्केगु ।

४) सुथाय् गुताइलय् निसैं गुताइलाइलय् तकखय् भैलद्यो व वेतद्योता जगत बहादुर मानन्धर नपांया पुचं पुजा क्वचाय्केगु ।

५) सुथाय् गुताइलाइ इलय् निसैं हिता इलय् तकखय् गुठी संस्थान कार्यालय व सिकःमिया नायो नपां च्वड पुजा क्वचाय्केगु ।

६) हिताइलय् बेतद्यो क्वकायो जगत बहादुर मानन्धर व गंगालाल कुम्मा नपां च्वड पुजायायगु ।

७) हिताइलय् निसैं हिंछता इलय् तक बेतद्यो हुयो, सफायाड, खतय तयो पुजा यायगु ।

८) हिंछता इलय् निसैं हिन्यता इलय् तकखय् भैलद्योःया मू नायो लक्ष्मी भक्त घेमोसु समेतया श्रीया पुजा न्ह्याकय्यु ।

९) न्हिनय् सिया हिन्यता इलय् गुठी संस्थान ख्वपया कार्यालय प्रमुख जुं तलेजुया पुजारी प्रगेश राजोपाध्यायता खड्ग लः ल्हायगु ।

१०) न्हिनय्सिया छता इलय् तक खय् पुजारी प्रगेश राजोपाध्याय नपां नेम्हा व हपः बिइपुं चौगुठीपुं नेम्हा तलेजुइ वाडः तलेजुया मू नायो नरेन्द्र प्रसाद जोशी व गुठी कार्यालयं बाजाया व्यवस्था याडः तः माही हय्यु ।

११) न्हिनय्सिया छताइलय्या दुनयं भैल नायो लक्ष्मी भक्त घेमोसु नपांया गुथियारपिसं गुह्यपुजा याय् धुकः द्यो खतय् तय्यु ।

१२) न्हिनय् सिया १:३० ताइलय् तकखय् भद्रकालीया खः(नकिंजु खचा) याता घखाय् छ्वयो नकिंजु अजिमाता खतय् बिज्याकः पुजा क्वचाय्केगु ।

१३) नेताइलय् तकखय् नकिंजु खचाता तमाहीया पु बहाया हःनय् श्यकय् हय्यु ।

१४) न्हिनय्सिया नेता इलयनिसैं भैलखः लुङ्गु याड ५:३० ताइलय् तक खय् भैलखः गःहिति यंकः खः थातय् लाकेगु ।

२०७७/१२/३०

१) ल्योसिं ख्यलय् १०:०० ताइलय् तक खय् ल्योसिंथानयता च्वालोसिं



डयंगुगु स्वप पौ. बःछि पौ(पाक्षिक)

चियगु ज्या दाफा भजन पाखं नारायण चवाल व कृष्ण भक्त चवाल जुपुं च्वड यायगु ।

२०७७/१२/३१

- १) सुथाय् १०:०० ताइल्य् भैलखः गःहितिं ल्योसिं ख्यलय् यंकेगु ।
- २) भद्रकालीया नायो नं पुजा क्वचाय्केगु ।
 - क) सुथाय् १०:०० ताइल्य् दुनय् भद्रकाली में स्याय् धुंकः बाजा गाजा नपां भद्रकालीया फल्चाय् में कप तयगु ।
 - ख) में कप ढवय् धुंक सम्हय नयानिं ल्योसिं गालय् ल्योसिं द्यो मिलय् यायगु ज्या दिलबहादुर मातांगीता याकयगु ।
 - ग) सुथाय् १०:०० ताइल्य् गुठी संस्थान शाखा कार्यालय् पाखं स्याउला (घांजा) लयो हयो ल्योसिंद्योया कपालय् तय्ता ल्योसिं ख्यलय् ह्यगु ।
- ३) गुठी संस्थान कार्यालय पाखं वल्लं व काप सुथाय् ८:०० ताइल्य् निसें १२:०० ताइल्य् तकखय् ल्योसिंख्यलय् थयंकयगु ।
- ४) न्हिनय् १२:०० - निसें २:०० ताइल्य् दुनय् ल्योसिंद्योकय् वल्लं चियगु ज्या नारायण चवाल, कृष्ण भक्त पिसं चिय सिधय्केगु ।
- ५) बैण्ड बाजा ज्वड प्रहरीत २:०० ताइल्य् ल्योसिंख्यलय् थयंकयगु ।
- ६) न्हिनय् २/३:०० ताइल्य् तकखय् वल्लं चिय धुनकिं गः हिति भैल खः व नकिंजु खचा ल्योसिंख्यलय् ह्यगु ।
- ७) बहनि सिया ५:०० ताइल्य् तक खय् ल्योसिं थानय् धुंकेगु ।

२०७८/१/१

- १) सुथाय् ६:०० ताइल्य् नगरबासीपिनिपाखं ११:०० बजे तक भैलद्यो पुजायाय् धुंकेगु ।
- २) सुथाय् ११/१२:०० ताइल्य् तकया दुनय इन्द्रायणीया पुजा व जात्रा क्वचाय्केगु ।
- ३) न्हिनय् सिया १२:०० ताइल्य् निसें ४:०० ताइल्य् तकखय् गुठी संस्थान कार्यालय पाखं इन्द्रायणी माजु थाय् नं मता च्याकः दुमजु चुकय् खड्ग पुजारीता लः ल्हाड मूचुकय् या पुजारी कुस्ले (जुगी) पिन्ता हासापा बियो लुं धवाका हः नय इन्द्रायणी माजुया पुजा याड श्री या प्रसाद कायो ल्योसिंख्यलय् यंकेगु अलय् आना मः काथं पुजा याड ५:०० ताइल्य् ल्योसिं क्वथय्गु ।
- ४) भैलखः गःहिति ह्यगु अलय् नकींजु खचा हयो गः हिति ल्वाकय्गु ।

२०७८/१/५

- १) न्हिनय्सिया १२:०० ता इलय् तक गुठी संस्थान कार्यालय पाखं भैरब-भैरबीया पुजा क्वचाय्केगु
- २) न्हिनय्सिया १:०० ताइल्य् तक खय् खतयवल्लं चिय धुंकयगु
- ३) बहनी २:०० ताइल्य् बाजागाजा नपां खड्ग तलेजुया पुजारीता लः ल्हायगु ।
- ४) बहनी ४:०० ताइल्य् भैलद्यो खतय् बिज्याकः गः हिति नं चाहिडकेगु
- ५) ५:०० ताइल्य् तकखय् चाहिडकय् सिधय्क खड्ग व भैलद्यो थाहाँ बिज्याक जात्रा क्वचाय्केगु ।



ख्वपया तः माही बिस्का जात्राया सद्भाव सभा

चैत्र २७

ख्वप नगरपालिकाया गवसालय २०७७ चैत्र २७ गते छगू सद्भाव सभा जुल । चैत्र २८ गते छो क्वहँ बिज्याकः न्ह्याकिगु ऐतिहासिक व सांस्कृतिक जात्रा शान्तिपूर्ण मर्यादित व सुरक्षित जुयो सभ्य भव्य ढंगं डायकेता ख्वपया तः माही त्वाल्य सद्भाव सभायागु खः । सभा नेमकिपाया छयाञ्जे नपां संघीय सांसद प्रेमसुवाल जुया मूपाहॉल्य ख्वप नगरपालिकाया प्रमुख सुनिल प्रजापतिजुया सभानायोल्य जगु खः । सभासं भीगु जात्रा भीसं हे बांलाक डायक्य मः धायगु सन्देश व आग्रह याड द्यगु खः । सभासं उप प्रमुख रजनी जोशी, गुठी संस्थान भक्तपुरया प्रमुख आनन्द कर्माचार्य, प्रहरी प्रशासन नपां ख्वप नगरपालिकाया प्रमुख प्रशासकीय अधिकृत रामलाल श्रेष्ठ जु पिसं नं न्वचु तयो द्यगु खः ।

न्ह्यागुनं विषय समस्या ज्यंकयता जनताया दथ्वी वाडः सहलह यायगु ज्याखं ख्वप नगरपालिकां सफलता कायो च्वंगु दः । थुगुसीया बिस्का जात्रा खय नेम्हा प्यम्हा मनुतयसं



नगरपालिकाया विरुद्धय जनता ल्वाकय तांगुलिं जनताता वास्तविक खॉ काड भीगु जात्रा भीसं बांलाक न्ह्याकय धायगु अनुरोध यायगु काथं सद्भावसभा जुगु खः । अपलं जेष्ठ नागरिक पुं उपस्थित दगु उगु सभाय् खॉ न्यड जनतात लयतायो वांगु खान्य दः ।



बिस्का जात्राया निंतिं ख्वप नगरपालिकाया ग्वसालय् जूगु सदभाव सभा
(२०७७ चैत्र २७ गते)



नगर प्रमुख प्रजापति जु बिस्का जात्राया स्वापु दःपुं नपांया बैठकय्
(२०७७ चैत्र २३ गते)



यल महानगरपालिकाया प्रमुख चिरिबाबु महर्जन का. रोहित नपां
(२०७७ चैत्र १८ गते)



सुनवल नगरपालिकाया उप-प्रमुख ढाँधिराम अर्याल स्वप
नगर प्रमुख सुनिल प्रजापतिनपां (२०७७ चैत्र ८ गते)

